


182. Mc 927.10.

রবীন্দ্র কাব্য পাঠ

মনোবিকাশের দ্বারা অনুসরণ

কাজী আবদুল ওদুদ



১৩৩৪ সাল


মূল্য পাঁচ টাকা

182. Mc 927.10.

রবীন্দ্র কাব্য পাঠ

মনোবিকাশের দ্বারা অনুসরণ

কাজী আবদুল ওদুদ



১৩৩৪ সাল

মূল্য পাঁচ টাকা

Out of Print.

প্রকাশক

মোহাম্মদ আফজাল-উল-হক

মোসলেম পাবলিশিং হাউস

৩নং কলেজ স্কয়ার, কলিকাতা



1877 Dec 11 18

ঢাকা নয়াবাজার শ্রীনাথ প্রেসে,
শ্রীসুরেন্দ্রনাথ সেন দ্বারা মুদ্রিত।

১৩৩১ সালে ঢাকা বিশ্বভারতী-সম্মিলনীর এক অধিবেশনে “রবীন্দ্রনাথ” নামে একটি প্রবন্ধ এই লেখককে পড়তে হয়েছিল। সেইটি স্থানে স্থানে পুনর্লিখিত হয়ে ১৩৩২ সালের “প্রবাসী”র কয়েক সংখ্যায় প্রকাশিত হয়। বর্তমান রবীন্দ্রকব্যপাঠ বইখানি সেই “প্রবাসী”তে প্রকাশিত প্রবন্ধটিরই পুনর্মুদ্রণ, তবে জায়গায় জায়গায় কিছু কিছু পরিবর্তন লক্ষিত হবে।

রবীন্দ্র-প্রতিভা একসময়ে তাঁর কাব্যের এই পাঠকের অপরিসীম আনন্দের কারণ হয়েছিল। সেই আনন্দ-স্পন্দন এই আলোচনাটির নানা ধরনের অসম্পূর্ণতার ভিতরে হয়ত আচ্ছন্নই হয় নাই এই ভরসায় এটি পুস্তকাকারে প্রকাশ করা গেল।

ঢাকা

মাঘ, ১৩৩৪

গ্রন্থকার

अबीलकाव्यपाठ

—অলৌকিক আনন্দের তার
বিধাতা বাহারে দেয়, তার বক্ষে বেদনা অপার,
তার নিত্য জাগরণ.....

দুইটি কথা

রবীন্দ্রনাথ তাঁর ছেলেবেলার কথা স্মরণ ক'রে 'জীবনস্মৃতি'তে লিখছেন :—

“এক একদিন মধ্যাহ্নে ছাদে আসিয়া উপস্থিত হইতাম...দূরে দেখা যাইত তরুচূড়ার সঙ্গে মিশিয়া কলিকাতা সহরের নানা উচ্চনীচ ছাদের শ্রেণী মধ্যাহ্ন-রোদ্রে প্রথর শুভ্রতা বিচ্ছুরিত করিয়া পূর্বদিগন্তের পাণ্ডুবর্ণ নীলিমা মধ্যে উধাও হইয়া গিয়াছে। সেই সকল অতিদূর বাড়ীর ছাদে একটি চিলা কোঠা উঁচু হইয়া থাকিত, মনে হইত তাহারা যেন নিশ্চল তর্জনী তুলিয়া চোখ টিপিয়া আপনার ভিতরকার রহস্য আমার কাছে সঙ্কেত করিবার চেষ্টা করিতেছে। ভিক্ষুক যেমন প্রাসাদের বাহিরে দাঁড়াইয়া রাজভাণ্ডারের রুদ্ধ সিঁকুকগুলার মধ্যে অসম্ভব রত্নমাণিক কল্পনা করে, আমিও তেমনি ঐ অজানা বাড়ীগুলিকে কত খেলা কত স্বাধীনতায় আগাগোড়া বোঝাই মনে করিতাম তাহা বলিতে পারি না। মাথার উপরে আকাশব্যাপী খরদীপ্তি, তাহারই দূরতম প্রান্ত হইতে চিলের সূক্ষ্ম তীক্ষ্ণ ডাক আমার কানে আসিয়া পৌঁছিত এবং সিঁঙ্গির বাগানের পাশের

গলিতে দিবাসুপ্ত নিস্তরু বাড়ীগুলোর সম্মুখ দিয়া পসারী সুর করিয়া ‘চাই চুড়ি চাই, খেলনা চাই’ হাঁকিয়া যাইত—তাহাতে আমার সমস্ত মনটা উদাস করিয়া দিত।”

স্বর্গীয় অজিতকুমার চক্রবর্তী তাঁর “রবীন্দ্রনাথে” যে একটি চিঠি তুলেছেন তার কতক অংশ এই—

“আমার নিজের খুব ছেলেবেলাকার কথা একটু একটু মনে পড়ে, কিন্তু সে এত অপরিষ্কৃত যে ভাল করে’ ধরতে পারিনে। কিন্তু বেশ মনে আছে, এক একদিন সকাল বেলায় অকারণে অকস্মাৎ খুব একটা জীবনানন্দ মনে জেগে উঠত। তখন পৃথিবীর চারিদিক রহস্যে আচ্ছন্ন ছিল। গোলাবাড়ীতে একটা বাঁধারি দিয়ে রোজ রোজ মাটি খুঁড়তাম, মনে করতাম কি একটা রহস্য আবিষ্কৃত হবে।”

প্রকৃতির সৌন্দর্য্যে আর বৈচিত্র্যে কিছু-না-কিছু আনন্দ উপভোগ করা বালক কেন সকল মানুষেরই সাধারণ ধর্ম্ম। তবু বলতে হবে, বালক রবীন্দ্রনাথ সেই “সকল মানুষের” শ্রেণীতে বেমানুম খাপ খেয়ে যান না। বালক বয়সেই অসীমের রহস্যকে এমন সারা প্রকৃতি দিয়ে অনুভব করা এক অসাধারণ ব্যাপার সন্দেহ নাই। বালক নচিকেতা নাকি মৃত্যুর গুহায় তলিয়ে গিয়ে অমৃতের উদ্ধার করে এনেছিলেন, তাঁর প্রশ্নে দেখতে পাই আশ্চর্য্য সমাহিতচিত্ততা। কবি রবীন্দ্রনাথও তাঁর কবিকীর্তিতে যে বৈচিত্র্য, বিপুলতা আর অমর সৃষ্টিমাহাত্ম্য লাভ করেছেন সেটি এই আশ্চর্য্য রহস্যের অনুভবকর্তা বালক রবীন্দ্রনাথের যোগ্য পরিণতি।

রবীন্দ্র-প্রতিভার এই বিশেষত্বকে অল্প দুটি কথায় নির্দেশ করা যেতে পারে—অতি তীক্ষ্ণ অনুভূতি আর সন্ধানপরতা। অনুভূতি তাঁর ভিতরে এর চাইতে কিছু কম থাকলে এই অপ্রতিহত সন্ধানপরতার মুখে তিনি হয়ত হতেন একজন বড় দার্শনিক অথবা বড় যোগী। কিন্তু প্রকৃত কবির মত অনুভূতিই তাঁর ভিতরে সব চাইতে প্রবল। এই অনুভূতিরই সঙ্গে-সঙ্গে প্রচ্ছন্নভাবে চলেছে সন্ধান। “ফাল্গুনী”র অন্ধ বাউলের মতন সত্যের অরুণ আলো প্রথমে তাঁর ভুরুর মাঝখানে খেঁয়া নৌকাটির মতো এসে ঠেকে, আর তিনি গান গেয়ে ওঠেন।

• প্রথম পর্য্যায়

রবীন্দ্রনাথ অতি অল্প বয়সেই কবিতা লিখতে আরম্ভ করেন। আশৈশব তিনি সাহিত্যের আবহাওয়ায় মানুষ; তাই বুদ্ধিমান বালকের পক্ষে এটি খুবই স্বাভাবিক। কিন্তু গানে ছন্দে বদ্ধ হ'য়ে উঠবার ক্ষমতাও যে তাঁর মজ্জাগত তা'র পরিচয় সেই অল্প বয়সের কবিতায়ও প্রচুর।

উন্মদ পবনে যমুনা তর্জিত,
 ঘন ঘন গর্জিত মেহ।
 দমকত বিদ্যুত পথতরু লুণ্ঠত,
 থর থর কম্পত দেহ।
 ঘন ঘন রিম্ কিম্ রিম্ কিম্ রিম্ কিম্,
 বরখত নীরদ পুঞ্জ।
 ঘোর গহন ঘন তাল তমালে
 নিবিড় তিমিরময় কুঞ্জ।
 বোল ত সজনী এ দুর যোগে
 কুঞ্জে নিরদয় কান
 দারুণ বাঁশী কাহ বজায়ত
 সক্রুণ রাধা নাম।

হোক এ অনুসরণ, হোক এ “আজকালকার সস্তা আগিনের
 বিলাতি টুংটাং মাত্র”, তবু এ বেশ একটু স্নেহ আর আনন্দের

দৃষ্টিতে দেখবার যোগ্য নয় কি ? কেমন-একটু রসবিলাসী মনের সাক্ষাৎ পাওয়া যাচ্ছে এর ভিতরে !

সন্ধ্যাসঙ্গীতে কবি নিজের বিশেষত্ব প্রথম উপলব্ধি করেন । আর পরলোকগত শ্রদ্ধেয় অজিতবাবুর বিশ্বাস “প্রভাত সঙ্গীতে কবির সমস্ত জীবনের ভাবটির ভূমিকা নিহিত রয়েছে ।” মিথ্যা নয় । এর “নির্ঝরের স্বপ্নভঙ্গ” কবিতায় কেমন এক বিপুল কবিপ্রাণ উদ্বেলিত হ’য়ে উঠেছে—

জাগিয়া উঠেছে প্রাণ,

(ওরে) উথলি উঠেছে বারি ;

(ওরে) প্রাণের বাসনা প্রাণের আবেগ

কুখিয়া রাখিতে নারি... ;

তার রুদ্ধ প্রতিভা-নির্ঝরিণী প্রকাশের মহাসাগরের ডাক শুনতে পেয়েছে—

ডাকে যেন—ডাকে যেন—সিন্ধু মোরে ডাকে যেন ।

আজি চারিদিকে মোর কেন কারাগার হেন... ;

“প্রভাতউৎসব” কবিতায় জগতের আনন্দ আর সৌন্দর্য্যের মূর্তি কবির চোখের সামনে কেমন সুন্দর ভাবে খুলে গেছে—

হৃদয় আজি মোর কেমনে গেল খুলি ।

জগত আসি সেথা করিছে কোলাকুলি ।

এসেছে সখাসখী বসিয়া চোখোচোখী,
দাঁড়িয়ে মুখোমুখী হাসিছে শিশুগুলি।
এসেছে ভাই বোন পুলকে ভরা মন,
ডাকিছে ভাই ভাই আঁখিতে আঁখি তুলি ;

আর ‘অনন্ত জীবন’ ‘অনন্ত মরণ’ ‘মহাস্বপ্ন’ ‘সৃষ্টিস্থিতি-
প্রলয়’ প্রভৃতি কবিতায় কবির প্রতিভা কি এক বিরাট সৃষ্টিতেই
না আত্মপ্রকাশ করতে চাচ্ছে !

“চাচ্ছে” কথাটি আমরা ইচ্ছা করেই ব্যবহার করেছি ;
আমাদের বন্বার মতলব—প্রকৃত স্রষ্টার সাক্ষাৎ এখনো আমরা
পাইনি। † সৃষ্টির জন্য কবির মনে আবেগ জেগে উঠেছে—
বিপুল গভীর সে আবেগ ; কবির দৃষ্টিও কিছু পরিষ্কার ; কিন্তু
নিশ্চয়ই এত পরিচ্ছন্ন নয় যাতে তা’র সামনে সৃষ্টি পূর্ণচ্ছন্দে
আত্মপ্রকাশ করতে পারে। “প্রভাত উৎসবে”র পরে “ছবিও
গানেও” প্রকৃত স্রষ্টাকে আমরা দেখতে পাইনে। কবির দৃষ্টি
এখানে আরো কিছু পরিষ্কার ; কিন্তু সানগোঁর ধারণায় ত্রুটি
রয়েছে ব’লে মনে হয়। পাঠক এর “একাকিনী” কবিতাটির
সঙ্গে Wordsworth-এর The Reaper কবিতাটি মিলিয়ে
পড়লে হয়ত আমাদের সঙ্গে একমত হতে পারবেন।

রবীন্দ্রনাথকে সর্বপ্রথম প্রকৃত স্রষ্টারূপে দেখতে পাই
তাঁর “কড়ি ও কোমলে”, বিশেষ করে এর সনেটগুলোতে।
তিনি নিজেও বলেছেন—

† অতি বিখ্যাত কবিতা। ‘নিষ্করের স্বপ্নভঙ্গে’ও এমন সব চরণ আছে যা আটটি
রবীন্দ্রনাথের হাত দিয়ে কখনই বেরুত না।

আমার কাব্যলোকে যখন বর্ষার দিন ছিল তখন কেবল ভাবাবেগের বায়ু এবং বর্ষণ; কিন্তু শরৎকালের “কড়ি ও কোমলে” কেবল আকাশে মেঘের রং নহে সেখানে মাটিতে ফসল দেখা দিতেছে। এবার বাস্তব সংসারের সঙ্গে কারবারে ছন্দ ও ভাষা নানাপ্রকার রূপ ধরিয়া উঠিবার চেষ্টা করিতেছে।

কড়ি ও কোমল

কড়ি ও কোমলের প্রথম কবিতায় কবির সাধটি যে ভঙ্গিমায় প্রকাশ পেয়েছে সবাইকে বলতে হবে তা সুন্দর। “বলাকার” একটি কবিতার কয়েকটি চরণ এই—

কত লক্ষ বরষের তপস্তার ফলে

ধরণীর তলে

ফুটিয়াছে আজি এ মাধবী... ;

কবিপ্রাণও তেমনিভাবে সংশয়, ব্যথা, আবেগ, উচ্ছ্বাস, সমস্তের ভিতর দিয়ে এক শুভ মুহূর্তে ফুলের মতো পূর্ণতা নিয়ে ফুটে উঠেছে—

মরিতে চাহিনা আমি সুন্দর ভুবনে,

মানবের মাঝে আমি বাঁচিবারে চাই।

এই সূর্য্যকরে এই পুষ্পিত কাননে

জীবন্ত হৃদয় মাঝে যদি স্থান পাই।

কড়ি ও কোমলে কবির এই প্রথম সৃষ্টিক্রমতা নানা ভাবে সার্থকতা খুঁজছে, দেখতে পাচ্ছি। শিশু-কবিতায় রবীন্দ্রনাথের

যে অসাধারণ কৃতিত্ব তারও পরিচয় এতে রয়েছে। (“সাত ভাই চম্পা”, “পুরানো বট”, “হাসিরাশি” “আশীর্ব্বাদ” ইত্যাদি।) আর কবির দেশাত্মবোধও এর আহ্বান-গীতে বহুত হচ্ছে—

পৃথিবী জুড়িয়া বেজেছে বিধান,
 শুনিতে পেয়েছি ওই—
 সবাই এসেছে লইয়া নিশান,
 কইরে বাঙ্গালী কই।

কিন্তু এর সনেটগুলোই যে সব-টাইতে বেশী প্রশংসার জিনিষ সে-সম্বন্ধে বোধ হয় সব কাব্যরসিকই একমত ; প্রায় প্রত্যেকটি সনেটই দামী মুক্তার মতো নিটোল—প্রকাশে, রসে, জমাট।

এইসব সনেটের কতকগুলোর ভিতর যে ভোগের সুর বাজছে তার জন্তে রবীন্দ্রনাথকে যথেষ্ট ‘নিন্দা’ সহ করতে হয়েছে। মনে হয়, নানা অর্ধসত্যের অত্যাচারে আমাদের জাতীয় জীবন বড় ক্লিষ্ট বলেই একটুখানি সংস্কার-বিমুক্ত হ’য়ে কাব্যের সৌন্দর্য্য উপভোগ করবার ক্ষমতা আমাদের ভিতরে এখন ব্যাহত। কাব্য আত্মারই এক প্রকাশ ; কাজেই এর সৌন্দর্য্যও “ন বলহীনেন লভ্যঃ।”

এই ভোগের “কুমুমের কারাগার” থেকে উদ্ধার পাবার জন্য পরে কবির অন্তরে আকাঙ্ক্ষা জেগেছে ব’লেই যে কবি আমাদের শ্রদ্ধার পাত্র, তা সত্য নয়। অনেক বড় কবির

ভিতরে এ বিদ্রোহ জাগেনি। তাই বলে তাঁদের কাব্য আমাদের কম প্রিয় নয়। কালিদাস, বিছাপতি, হাফেজ, Burns (বার্নস), Byron (বায়রন্) প্রভৃতি কবির কথা স্মরণ করে আমরা এ কথা বলছি। আসলে, জীবনে ভোগ অসত্য নয়। আর এই সনেটগুলোর ভিতরে সুপ্রকাশের সৌন্দর্য্য স্নাত হ'য়ে সেই ভোগের সত্য যথাযথভাবেই ফুটে উঠেছে।

তা ছাড়া রবীন্দ্রনাথের প্রতিবাদেরও বিশেষত্ব আছে। নৈতিক বোধ তাঁর ভিতরে দুর্বল ছিল পরে সবল হয়েছে বলে যে তাঁর মনে এই প্রতিবাদ জেগেছে তা সত্য নয়। “কুসুমের” কাঁরাগারে বদ্ধ হওয়ার আকাঙ্ক্ষা তাঁর পক্ষে যেমন স্বাভাবিক, এর থেকে মুক্তি পাওয়ার ইচ্ছাও তাঁর ভিতরে তেমনি বলবতী, কেননা, এই দুই-ই একই মূল থেকে উৎসারিত হচ্ছে—তাঁর ভিতরকার সেই চিরজাগ্রত রহস্যের সন্ধানপরতা থেকে। নারী সৌন্দর্য্য ত সাধারণতঃ আমরা তুচ্ছ ভেবেই উড়িয়ে দিতে চেষ্টা করি; যাকে আমরা মহত্তর ভাব বলি, পরে পরের কাব্যে দেখে, সেই জাতীয়তা, স্বাদেশিকতা ইত্যাদির বন্ধন থেকে মুক্ত হওয়ার আকাঙ্ক্ষাও কবির ভিতরে এমনই প্রবল।

রবীন্দ্র-প্রতিভার বিশেষত্ব তাঁর ভোগের কবিতার ভিতরেও যথেষ্ট পরিস্ফুট। কালিদাসের দুঃস্বস্ত শকুন্তলার কথা স্মরণ করে বলছেন—

অনাম্রাতং পুষ্পং কিশলয়মলুনং কররুহৈঃ

অনাবিক্কেং রত্নং মধু অনাম্রাদিতরসম।

হাফেজ তাঁর “মাশুকের” কথা স্মরণ করে বলছেন—

রুজিয়ে মা বাআদ লাজে শকর আফশানে ওমা † ;

আর Burns তাঁর Highland Maryর কথা স্মরণ করে বলছেন—

How sweetly bloom'd the gay green birk
How rich the hawthorn's blossoms,
As underneath the fragrant shade
I clasp'd her to my bosom !
The golden hours on angel wings
Flow o'er me and my dearie ;
For dear to me as light and life
Was my sweet Highland Mary.

এসব কবিতার ভিতরে ভোগ কেমন আত্মসম্পূর্ণ, যথেষ্ট তৃপ্তি স্বস্তি এ সমস্তে রয়েছে। তবে কালিদাসের ভোগ কেমন গোলাপগন্ধি ; আর হাফেজে, Burns-এ মৃদুতা আর আবেগ কিছু বেশী। এসবের সঙ্গে মিলিয়ে রবীন্দ্রনাথের ভোগের স্বরূপ যখন উপলব্ধি করতে যাই তখন দেখি, কালিদাসের মতন সৌন্দর্যের উপাসক তিনি ; মাঝে-মাঝে বুঝতে পারা যায়, এ ভোগে তিনি তৃপ্ত ; কিন্তু মোটের উপর এই ভোগের ভিতরে আকর্ষণ নিমজ্জনের স্বস্তি যেন তিনি পাচ্ছেন না। সেইজন্য কেমন-একটা ব্যথা তাঁর “বাহু” “দেহের মিলন” প্রভৃতি

† “লাল শীতলী ঠোট প্রিয়ার রোজ পাই ভরাই লাখ লাখ চুষনে।” কবি
নজরুল ইসলামের অনুবাদ।

কবিতায় বর্তমান । আর সব ভোগ সব অনুভূতির ভিতরে পরম
রহস্যমণ্ডিত সত্যের সন্ধানই যে তাঁর মজ্জাগত মানসীর “হৃদয়ের
ধন” কবিতার তা পরিষ্কার বুঝতে পারা যাচ্ছে ।

নাই নাই কিছু নাই শুধু অন্বেষণ ।

নীলিমা লইতে চাই আকাশ ছাঁকিয়া

কাছে গেলে রূপ কোথা করে পলায়ন,

দেহ শুধু হাতে আসে শাস্ত করে হিয়া ।

প্রভাতে মলিন মুখে ফিরে যাই গেহে,

হৃদয়ের ধন কভু ধরা যায় দেহে !

মানসী

“কড়ি ও কোমলের” পরে মানসীতে দেখতে পাই, কবির
প্রকাশ-সামর্থ্য আরো বৃদ্ধি পেয়েছে । হৃদয়ের ভাবতরঙ্গ
আরো বিক্ষুব্ধ, জীবন হর্ষে আর ব্যথায় জটিল হ’য়ে দেখা
দিয়েছে । কিন্তু এই জটিলতায় তাঁর দৃষ্টি বিপর্যাস্ত হ’য়ে যাচ্ছে
না । উপরে “হৃদয়ের ধন” কবিতার কয়েক চরণ যে উদ্ধৃত
হয়েছে তা’তে কবি তাঁর সমস্ত কথা নিখুঁত আর অব্যর্থভাবে
পাঠকের সামনে ধরতে পেরেছেন ।

“মানসীকে” মোটামুটি দুইভাগে ভাগ ক’রে পড়া যেতে
পারে । প্রথমভাগের বিশেষত্ব এর প্রেমের কবিতা । মানসীর
চরণাঘাতে কবির হৃদয়ে সৌন্দর্য্য যেন সহস্রধারে উচ্ছ্রিত হ’য়ে
উঠেছে । মানসীকে কবি কখনো বলছেন—

কে আমারে যেন এনেছে ডাকিয়া,
এসেছি ভুলে ।

তবু একবার চাও মুখপানে
নয়ন তুলে ।

দেখি ও নয়নে নিমিষের তরে
সেদিনের ছায়া পড়ে কি না পড়ে,
সজল আবেগে আঁখিপাতা দুটি
পড়ে কি ঢুলে ।

ক্ষণেকের তরে ভুল ভাঙায়োনা,
এসেছি ভুলে ।

কখনো ভুল ভেঙে যাওয়ার কবি বলছেন—

বাঁশি বেজেছিল, ধরা দিনু যেই
 থামিল বাঁশি ।

এখন কেবল চরণে শিকল
কঠিন ফাঁসি !

কখনো বলছেন, বিরহেই তিনি ছিলেন ভালো—

তবু সে ছিনু ভালো আধো আলো আঁধারে,
গহন শত-ফের বিষাদের মাঝারে ।

কখনো শূন্যহৃদয়ে তিনি বসে' আছেন, মনে তাঁর আকাঙ্ক্ষা
জাগছে, কবে—

পাগল ক'রে দিবে সে মোরে
চাহিয়া,

হৃদয়ে এসে, মধুর হেসে
প্রাণের গান গাহিয়া ।

কখনো সংশয়ের আবেগে কবি স্থির থাকতে পারছেন না—

ভালো বাসো, কি না বাসো বুঝিতে পারিনে,

তাই কাছে থাকি ।

তাই তব মুখপানে রাখিয়াছি মেলি

সর্বগ্রাসী আঁখি ।

.....

কেন এ সংশয়-ডোরে বাঁধিয়া রেখেছ মোরে,

বহে যায় বেলা ।

জীবনের কাজ আছে, প্রেম নহে ফাঁকি,

প্রাণ নহে খেলা ।

কখনো এক অপূর্ব বিচ্ছেদের ছবি আঁকছেন—

সেই ভালো, তবে তুমি যাও !

তবে আর কেন মিছে করুণ নয়নে

আমার মুখের পানে চাও !

আবার কখনো সমস্ত আশা বিসর্জন দিয়ে কবি বলছেন—

তবু মনে রেখো...

তবু মনে রেখো যদি মনে পড়ে' আর

আঁখি-প্রান্তে দেখা নাহি দেয় অশ্রুধার ।

এইসব কবিতায় অতি সূক্ষ্ম অনুভূতিও অনুপম সৌন্দর্য-ভঙ্গিমা নিয়ে প্রকাশ পেয়েছে । এগুলো যে অ-“বাস্তব” নয় তার ভালো একটি প্রমাণ আমরা জানি । আমাদের এক সুবিখ্যাত কবি-বন্ধু তাঁর “মানসী” খানিতে এই সব কবিতার বহু চরণের পাশে-পাশে তারিখ দিয়ে রেখেছেন ।

‘মানসী’তে কবি দক্ষ শ্রুতি হ’য়ে উঠেছেন। ভাব, ছন্দ, প্রকাশ-ভঙ্গিমা সমস্তেরই উপর পর্যাপ্ত অধিকারের জন্যে এই মানসীর সময় থেকে যত কবিতা তিনি লিখেছেন তা’র প্রায় প্রত্যেকটিতেই কিছু-না-কিছু প্রশংসাযোগ্য আছে। জগতের অতি অল্প কবি সম্বন্ধেই এত বড় কথা বলা যেতে পারে। আমাদের কথা যেন কেউ ভুল না বোঝেন। বলছি না, রবীন্দ্রনাথ যত কবিতা লিখেছেন তা’র প্রায় সবই শ্রেষ্ঠ কবিতা, অর্থাৎ শ্রেষ্ঠ সৃষ্টি। কাব্যে যা শ্রেষ্ঠ সৃষ্টি কোনো কবির ভিতরেই তা পরিমাণে বা সংখ্যায় বেশী নয়, এমন-কি অল্পই। এখানে আমরা শুধু এই কথা বলতে চাচ্ছি যে, তাঁর স্বভাবসিদ্ধ তীক্ষ্ণ অনুভূতি, সন্ধানপরতা আর প্রকাশ-ভঙ্গিমার গুণে সাধারণ লেখকের স্তরে তিনি প্রায় কখনো নেমে পড়েননি; এটি যেন তাঁর প্রতিভার পক্ষে প্রায় অসম্ভব।

যে-সমস্ত কবিতার উল্লেখ করা হয়েছে, তা ভিন্ন ‘মানসী’র প্রথম ভাগে “ক্ষণিক মিলন”, “একাল” ও “সেকাল”, “আকাঙ্ক্ষা”, “নিষ্ফল প্রয়াস”, “নারীর উক্তি”, “পুরুষের উক্তি” প্রভৃতি আরো সুন্দর কবিতা রয়েছে। কিন্তু এসমস্তের মুকুটমণি হচ্ছে “নিষ্ফল কামনা।”

বৃথা এ ক্রন্দন !

বৃথা এ অনল-ভরা ছরস্তু বাসনা !

রবি অস্ত যায়।

অরণ্যেতে অন্ধকার আকাশেতে আলো।

প্রথম পর্য্যায়

সন্ধ্যা নত-আঁখি

ধীরে আসে দিবার পশ্চাতে ।

বহে কি না বহে

বিদায়-বিষাদ-শ্রান্ত সন্ধ্যার বাতাস ।

দুটি হাতে হাত দিয়ে ক্ষুধার্ত নয়নে

চেয়ে আছি দুটি আঁখি-মাঝে ।

খুঁজিতেছি, কোথা তুমি,

কোথা তুমি !

*

*

এর ছন্দ, যতি, ভাবাবেগের বিপুলতা, চিত্তার অতলস্পর্শতা, প্রকাশ-ভঙ্গিমার অব্যর্থতা, সমস্তের মিলনে সৃষ্টি যে অপূর্ণ মহিমায় আত্মপ্রকাশ করেছে কি কথায় তা'র যোগ্য প্রশংসা হ'তে পারে ! ৭৯ লাইনের কবিতা এটি, অথচ কোথাও এতটুকু ত্রুটি, এতটুকু দীনতা, প্রকাশ পায়নি ।—এই কবিতাটিকে আমরা কত উঁচুতে স্থান দিই তা শুধু এই কথাতেই বোঝা যাবে যে, সমগ্র রবীন্দ্র-কাব্য-সাহিত্যে এ রকম আর দুটি কবিতার সাক্ষাৎ আমরা পাই—চিত্রার “উর্বরশী” আর বলাকার “বলাকা” কবিতাটি । এগুলো কাব্যে শ্রেষ্ঠ সৃষ্টি একথা বললে অতি সামান্যই বলা হয় । শ্রেষ্ঠ সৃষ্টি রবীন্দ্রকাব্যে আরো আছে । অনুভূতির আগ্নেয়গিরি সমুখে কি গগনস্পর্শী সৃষ্টির অধিকার বিধাতা মানুষকে দিয়েছেন এসব তা'রই প্রমাণ ।

মানসীর দ্বিতীয় ভাগের অর্থাৎ শেষের দিকের অনেক কবিতায় দেখছি, কেমন বেদনামাখা কবি-হৃদয়,—বিশ্ববিধানে জড়প্রকৃতির নিশ্চয়মতার জন্য এই বেদনা (“নিষ্ঠুর সৃষ্টি”, “সিন্ধু তরঙ্গ” প্রভৃতি), নিজেকে ক্ষুদ্র জীবনের কারাগারে বন্দী দে’খে এই বেদনা। তাঁর বিরাট আত্মা সংসারে পরিব্যাপ্ত হবার জন্যে ভিতরে-ভিতরে কামনা করছে। এতদিনের যে একলা-মনে রস-সন্তোগের জীবন, তা’র মায়া কাটাতে তাঁর বাজে, অথচ কর্মক্ষেত্রে কাঁপিয়ে পড়বার জন্যে আকাঙ্ক্ষাও তাঁর মনে যথেষ্ট প্রবল হ’য়ে দেখা দিয়েছে।

কবির এই অবস্থার সুন্দর চিত্র বিধৃত হ’য়ে আছে এর ‘ভৈরবী গান’ কবিতাটিতে। তাঁর এই সময়কার এমন সৌন্দর্য্য-সৃষ্টি-ক্ষমতা, এত সৌন্দর্য্য-উপভোগ, সব যেন ফেটে চৌচির হ’য়ে ভিতরকার বেদনাময় কবিহৃদয় খুলে ধরেছে।—

যদি কাজ নিতে হয় কত কাজ আছে,

একা কি পারিব করিতে ?

কাদে শিশির-বিন্দু জগতের তৃষা

হরিতে।

কেন অকুল সাগরে জীবন সাঁপিব

একেলা জীর্ণ তরীতে।

শেষে দেখিব, পড়িল সুখ-যৌবন

ফুলের মতন খসিয়া,

হায় বসন্ত-বায়ু মিছে চলে গেল

খসিয়া,

সেই যেখানে জগৎ ছিল এককালে
সেইখানে আছে বসিয়া ।

* * *

তবু সামনে না চ'লে তিনি পারছেন না ; তাঁর ভিতরকার
দুর্জয় শক্তি-স্রোত আপনা থেকে এগিয়ে চলেছে ।

ওগো, থাম, যারে তুমি বিদায় দিয়েছ
তা'রে আর ফিরে চেয়ো না ।

ওই অশ্রু-সজল ভৈরবী আর
গেয়ো না ।

আজি প্রথম প্রভাতে চলিবার পথ
নয়ন-বাষ্পে ছেয়ো না !

* * *

সেই আপনার গানে আপনি গলিয়া
আপনারে তারা ভুলাবে,
স্নেহে আপনার দেহে সঙ্করণ কর
বুলাবে ।

সুখে কোমল শয়নে রাখিয়া জীবন
ঘুমের দোলায় ছুলাবে ।

ওগো এর চেয়ে ভালো প্রথর দহন,
নিষ্ঠুর আঘাত চরণে !

যাবো আজীবন কাল পাষণ-কঠিন
সরণে ।

যদি মৃত্যুর মাঝে নিয়ে যায় পথ,
সুখ আছে সেই মরণে ।

আন্তে-আন্তে চলার আনন্দই তাঁর ভিতরে কেমন জমাট হ'য়ে উঠেছে, মানসীর 'পরিত্যক্ত' কবিতায় তার পরিচয় রয়েছে। বন্ধুদের দ্বারা পরিত্যক্ত হ'য়েও তিনি আর দম্ছেন না। প্রতিভার এই স্বাতন্ত্র্য বড় রহস্যপূর্ণ।

বন্ধু এ তব বিফল চেষ্টা,
 আর কি ফিরিতে পারি ?
 শিখর-গুহায় আর ফিরে যায়
 নদীর প্রবল বারি ?
 জীবনের স্বাদ পেয়েছি যখন,
 চলেছি যখন কাজে,
 কেমনে আবার করিব প্রবেশ
 মৃত বরষের মাঝে ?

'মানসী'র "বঙ্গবীর", "ধর্মপ্রচার" প্রভৃতি ব্যঙ্গ কবিতার ভিতরেও যে-বেদনার সঞ্চার হয়েছে দেখতে পাওয়া যায়, তা এক বড় জীবনেরই গর্ভবাস থেকে মুক্ত হওয়ার বেদনা। বাঙালীর বোতাম-আঁটা পোষমানা প্রাণের তলে বাস্তবিকই দুরন্ত কামনা সর্পসম কবির মনে ফুঁসছে—

ইহার চেয়ে হতেম যদি আরব বেহুইন—
 চরণতলে বিশাল মরু দিগন্তে বিলীন।

গুরু গোবিন্দের পরই নিষ্ফল উপহার কবিতাটি বেশ বিশিষ্টতা নিয়ে দাঁড়িয়ে আছে। "সুরদাসের প্রার্থনা" "গুরু

গোবিন্দ” প্রভৃতি ভালো কবিতা, কিন্তু সৃষ্টি-হিসাবে হয়ত নিখুঁৎ নয়। এসমস্ত কবিতায় এমন-একটা গতি ছন্দের ভিতর দিয়ে ধেয়ে চলেছে যে তা’রই জন্য সৃষ্টি-কমল যেন পূর্ণভাবে দল মেলতে পারেনি। নিষ্ফল উপহারে দেখছি, কবি তাঁর সেই গতির রাশ খুব জোরে টেনে ধরেছেন এবং রাশ টেনে ধরে তিনি যে এক চমৎকার ভঙ্গিতে রথ চালনা করতে পারেন, তার পরিচয় দিয়েছেন। এর সর্বত্র কি দৃঢ় সংযম! এক-একটি স্তবক এক-একটি ভাব প্রায় পুরোপুরি প্রকাশ করছে বলে তাদের সমবায়ে সমগ্র কবিতাটিতে যে ভাবধ্বনি উঠছে তা গস্তীর আর উদাত্ত।

মানসীর শেষের দিকে আরো কতকগুলি সুন্দর কবিতা আছে। ধ্যান, অনন্ত প্রেম, উচ্ছৃঙ্খল প্রভৃতি। ধ্যান প্রতিভার প্রাণ। কবি নিজের সেই ধ্যানী রূপ যেন উপলব্ধি করতে পেরেছেন—

তুমি যেন ওই আকাশ উদার,
আমি যেন ওই অসীম পাথার,
আকুল করেছে মাঝখানে তার
আনন্দ পূর্ণিমা।

উচ্ছৃঙ্খল কবিতাটি এক সুন্দর সৃষ্টি। কবির মনোজগৎ এখন যথেষ্ট বিস্তৃত, সেই বিস্তৃত মনোজগতের বৃকে উচ্ছৃঙ্খলকে তিনি দাঁড় করিয়েছেন।

প্রতিদিন বহে যুগ্ধ সমীরণ,

প্রতিদিন ফুটে ফুল ।

ঝড় শুধু আসে ক্ষণেকের তরে

সৃজনের এক ভুল ।

দুরন্ত সাধ কাতর বেদনা

ফুকরিয়া উভরায়

আঁধার হইতে আঁধারে ছুটিয়া যায় ।

এ আবেগ নিয়ে কার কাছে যাবো,

নিতে কে পারিবে মোরে !

কে আমারে পারে আঁকড়ি রাখিতে

ছ'খানি বাহর ডোরে ।

নবীন কবি নজরুল ইসলামের সুবিখ্যাত ‘বিদ্রোহী’র আবেগ এর চাইতে অনেক বেশী ; কিন্তু সে আবেগ এমন সত্যদৃষ্টি স্রষ্টার হাতে নিয়ন্ত্রিত নয় । তাই তার অনেকখানি কাব্য-হিসাবে অকিঞ্চিৎকর । * অতি বিপুল আবেগ সৃষ্টিক্রমতার সঙ্গে যুক্ত হলে কি অপরূপ কাব্য হতে পারে, বায়রনের (Byron) চাইল্ড্ হারল্ডের (Childe Harold) শেষের দিকের সমুদ্র-বন্দন তার এক বড় প্রমাণ ।

* সমস্ত অসম্পূর্ণতা সত্ত্বেও সত্যকার প্রতিভার স্পন্দনও যে এর ভিতরে বুঝতে পারা যায় সে বিষয়ে সন্দেহ নাই ।

সোনার তরী

“মানসী”র যুগের পর রবীন্দ্রনাথের জীবনে এক বড় পরিবর্তন এসেছিল। এতদিন শুধু একলা-মনে কবির জীবন তিনি যাপন করছিলেন। “সোনার তরী” যে যুগের লেখা তখন তিনি জমিদারী-কাজের ব্যাপদেশে বৃহৎ বাস্তব জগতের সঙ্গে মিলবার সুযোগ পেয়েছেন। তাঁর গভীর সবল প্রকৃতি এই বিপুল বাহিরকে হজম করে যে কি অলৌকিক পরিপুষ্টি লাভ করেছে, “সোনার তরী” “গল্পগুচ্ছ” “চিত্রা” প্রভৃতি তা’র দৃষ্টান্ত। এই যুগ রবীন্দ্র-সাহিত্যে “সাধনার যুগ” নামে খ্যাত; এবং অনেকের বিশ্বাস, এই যুগই কবি-রবীন্দ্রনাথের জীবনের শ্রেষ্ঠ যুগ। এ সম্বন্ধে কিছু আলোচনা আমরা পরে করব।

মানসীর সুরের সঙ্গে সোনার তরী, চিত্রা, ইত্যাদির সুরের বেশ পার্থক্য রয়েছে। সোনার তরী প্রভৃতির কবিস্বদয় নিশ্চয়ই পূর্ণতর, পরিপুষ্টতর। রবীন্দ্রনাথের যে তীক্ষ্ণ অনুভূতি আর সন্ধানপরতা তা যেন এখানে এক পরম সৌন্দর্য্যময় প্রকাশে নিজের সার্থকতা উপলব্ধি করেছে। তাই সোনার তরী, চিত্রা, গল্পগুচ্ছ, প্রভৃতির ভাব শক্তিমান্ আনন্দময় দ্রষ্টার ভাব—ক্ষুদ্র বৃহৎ সমস্তের অন্তরের সৌন্দর্য্য আর সত্য কবি নিবিড়ভাবে অনুভব করছেন, আর এক অপূর্ব্ব ছন্দে সে-সব শরীরী হয়ে উঠছে।

কিন্তু মানসীর সুর সাধারণতঃ সঙ্গীতের সুর। যে অনুভূতি কবির মনে জাগ্ছে তা তীক্ষ্ণ ; সৌন্দর্য্যও তাঁর চোখে ফুটে উঠেছে নানা রেখা ও বর্ণ বৈচিত্র্য নিয়ে ; কিন্তু এসব মূর্তির মতো গড়ে তোলার দিকে কবির তত চেষ্টা নয়, যত এর সৌন্দর্য্যে আবেগে নিজেকে মেতে ওঠা—নৃত্য করা। এই আনন্দময়, আবেগময়, বেদনাময়, চির-আন্দোলিত, কবিস্বদয়ের স্পর্শ যাদের কাছে অপূর্ব্ব “মানসী” তাঁদের প্রিয় কাব্য।

রবীন্দ্র-প্রতিভার প্রকাশ-ভঙ্গির এই দুই রূপ—রহস্যময় বংশীবাদকের রূপ, আর সমাহিতচিত্ত দ্রষ্টার রূপ—শুধু তাঁর যৌবনের রচনায় নয়, পরে পরের রচনাও প্রকাশ পেয়েছে। এদিকে মানসী, কল্পনা, ক্ষণিকা খেয়া, গীতাঞ্জলি, গীতিমাল্য, গীতালি, অন্যদিকে সোনার তরী, চিত্রা, চিত্রাঙ্গদা, চৈতালি, কথা, কাহিনী, নৈবেদ্য, বলাকা, প্রভৃতি দাঁড় করিয়ে আমরা এ কথা বলছি।

(শুধু নিজের মনে বন্ধ না থেকে বৃহৎ জগতে ছড়িয়ে পড়বার জন্যে কবির মনে যে আকাঙ্ক্ষা জাগ্ছিল, সোনার তরীতে তা কতকটা সার্থক হয়েছে। কতকটা বলছি এই জন্যে যে, যে-জগতে এখন ঘুরে-ফিরে তিনি তৃপ্তি পাচ্ছেন, গ্যাটের মেফিস্টোফিলিস্‌এর ভাষায়, তা ক্ষুদ্র জগৎ (Little World). (রবীন্দ্র-প্রতিভার অন্যও যে তা Little World তা পরে

দেখ্বে।) সংসারের নানা সুর তাঁর চিত্তে এখন কিছু প্রবেশাধিকার পেয়েছে। আর সবচাইতে বড় কথা এই যে সংসারের প্রাত্যহিক জীবনের যে একটি আনন্দময় রূপ আছে সেটি কবির চোখে পড়েছে।

আমাদের বৈরাগ্য-প্রপীড়িত তামসিক জীবন-যাত্রার বিরুদ্ধে রবীন্দ্রনাথের যে তীব্র প্রতিবাদ সোনার তরী কাব্যেই তার সূচনা নয়। কিন্তু যে সত্যের উপর দাঁড়িয়ে কবি এই প্রতিবাদ করেছেন। তার প্রথম পর্য্যাপ্ত উপলব্ধি দেখতে পাই এই সোনার তরীতে ও সোনার তরীর যুগের গল্পগুচ্ছে।) ‘আকাশের চাঁদ’ কবিতাটিতে দেখছি, এক অমৃত সাধক আকাশের চাঁদ হাতে পাওয়ার খেয়ালে আর সব দিকে উদাসীন হয়ে শুধু নিজের খেয়াল মতোই চলেছিল; শেষে তার চোখ পড়ল প্রাত্যহিক জীবনের সমস্ত ক্ষুদ্রতা-তুচ্ছতার উপর, সে দেখলে, এই সমস্ত ক্ষুদ্রতা তুচ্ছতার বুকে কি অমৃত লুকানো রয়েছে। অর্থাৎ দেশেরই জড়তাগ্রস্ত খেয়ালী-চিত্তকে প্রাত্যহিক জীবনের তিতকার অমৃতের সন্ধান কবি দিচ্ছেন।

এমন সময়ে সহসা কি ভাবি’

চাহিল সে মুখ ফিরে,

দেখিল ধরণী শ্যামল মধুর

সুনীল সিদ্ধতীরে।

সোনার ক্ষেত্রে কৃষাণ বসিয়া

কাটিতেছে পাকা ধান,

ছোটো-ছোটো তরী পাল তুলে যান
মাঝি বসে গায় গান ।

* * *

দেখিল চাহিয়া জীবনপূর্ণ
সুন্দর লোকালয়,
প্রতিদিবসের হরষে-বিষাদে
চির-কল্লোলময়
স্নেহ-সুখা লয়ে গৃহের লক্ষ্মী
ফিরিছে গৃহের মাঝে,
প্রতিদিবসেরে করিছে মধুর
প্রতিদিবসের কাজে ।

* * *

ছোটো-ছোটো ফুল ছোটো ছোটো হাসি,
ছোটো কথা, ছোটো সুখ,
প্রতিনিমিষের ভালোবাসাগুলি,
ছোটো-ছোটো হাসিমুখ ।
আপনা-আপনি উঠিছে ফুটিয়া
মানবজীবন ধরি
বিজন শিখরে বসিয়া সে তাই
দেখিতেছে ফিরি-ফিরি' ।

জাগতিক জীবন, প্রাত্যহিক জীবন-যাত্রা, যে অমৃতময়
রবীন্দ্রনাথের জীবন ও কাব্য-সাধনায় এ এক বড় সত্যের
উদ্ঘাটন । এ মন্ত্রের দর্শন কবি পেয়েছেন বহু পরে “নৈবেদ্য”
কাব্যে—

বৈরাগ্য-সাধনে মুক্তি

সে আমার নয় ।

অসংখ্য বন্ধন-মাঝে মহানন্দময়

লভিব মুক্তির স্বাদ ।.....

কিন্তু কতরূপে কত ভাবে যে কবি বারবার এই সত্যের সম্মুখীন হয়েছেন, কাব্যরসিক ও সত্যজিজ্ঞাসু—দুয়েরই তা অনুধাবনের বিষয় ।

সোনার তরীতে রবীন্দ্র-প্রতিভায় যেন বান ডাকতে চাচ্ছে । এখানে এক মহা-ঐশ্বর্য্যপূর্ণ কবিহৃদয় আমাদের সামনে উদ্ঘাটিত—ভাব, ছন্দ, সামগ্রোর ধারণা, সমস্তই ঐশ্বর্য্যপূর্ণ । তার তাঁর বিপুল সৌন্দর্য্যানুভূতি সমুদ্র-ফেনার মতনই এক দিগন্তবিস্তৃত স্বপ্নমাধুরী রচনা করেছে । কিন্তু সৃষ্টি হিসাবে সোনার তরীর খুব বেশী কবিতা হয়ত অনবদ্য নয়,—কবির চোখে লেগে রয়েছে সৌন্দর্য্যের কেমন এক স্বপ্নাবেশ । সোনার তরীর মানস-সুন্দরী কবিতাটিতে কি অদ্ভুত সৌন্দর্য্য পূজা ! কিন্তু এই পূজায়ও লেগে রয়েছে রবীন্দ্রনাথের সেই প্রকৃতিগত রহস্যের সন্ধানপরতা ।

(কিন্তু সম্পূর্ণ পরিচ্ছন্ন দৃষ্টির সৃষ্টি না হলেও, বলা যেতে পারে, সৌন্দর্য্যানুভূতির গভীর তন্ময়তার সৃষ্টি এই সোনার তরী ; তাই রবীন্দ্র-প্রতিভার এও এক বড় দান । প্রকৃতির সৌন্দর্য্যের ভিতরে,

নরনারীর প্রেমপ্রীতির ভিতরে, এই যে তন্ময়তা এরই খেবে
উদ্ধৃত হয়েছে উচ্চতর আত্মপ্রকাশ ও পূর্ণতর সৃষ্টি ।)

সোনার তরীর ‘বৈষ্ণব কবিতা’য় কবি তাঁর কথাটা কত
স্পষ্ট করে বলেছেন ! আগে আকাশের চাঁদ কবিতাটি যে
আমরা আংশিক উদ্ধৃত করেছি, তার চাইতে এর প্রকাশ ভঙ্গিম
অনেক উৎকর্ষ লাভ করেছে । অন্তরের সরসতার সত্যে উদ্ধৃত
হয়ে দেশের প্রচলিত মতবিশ্বাসের মোহ কবি কতটা এড়িয়ে
উঠেছেন তারও স্পষ্ট পরিচয় এতে রয়েছে ।

শুধু বৈকুণ্ঠের তরে বৈষ্ণবের গান ?

পূর্বরাগ, অনুরাগ, মান-অভিমান,
অভিসার, প্রেমলীলা, বিরহ, মিলন,
বৃন্দাবন-গাথা.....

.....একি শুধু দেবতার ?

.....আমাদেরই কুটীর কাননে

ফোটে পুষ্প, কেহ দেয় দেবতাচরণে,

কেহ রাখে প্রিয়জন তরে—তাহে তাঁর

নাহি অসন্তোষ । এই প্রেমগীতিহার

গাথা হয় নরনারী-মিলন মেলায়,

কেহ দেয় তাঁরে, কেহ বঁধুর গলায় ।

দেবতারে যাহা দিতে পারি দিই তাই

প্রিয়জনে—প্রিয়জনে যাহা দিতে পাই

তাই দিই দেবতারে ; আর পাবো কোথা ?

দেবতারে প্রিয় করি প্রিয়েরে দেবতা !

সোনার তরীর “যেতে নাহি দিব” কবিতাটি বাস্তবিকই এক
অপরূপ সৃষ্টি—হয়ত সমস্ত “সোনার তরী” কাব্যখানির শ্রেষ্ঠ সৃষ্টি
এটি। “মানসী”তে দেখেছি, কবি নিষ্ঠুর সৃষ্টির সন্মুখীন হয়েছেন।
কিন্তু জগতের কাঁচা কোমল প্রাণের সঙ্গে তার যে চিরসংগ্রাম
তার ফলাফল কি, সে-কথাটি তাঁর দৃষ্টিতে তেমন ফুটে ওঠেনি।
এই “যেতে নাহি দিব” কবিতায় সেটি অপরূপ বেদনায় বিকশিত
হয়ে উঠেছে !

* * *

এ অনন্ত চরাচরে স্বর্গমর্ত্য ছেয়ে
সবচেয়ে পুরাতন কথা, সবচেয়ে
গভীর ক্রন্দন “যেতে নাহি দিব।” হায়,
তবু যেতে দিতে হয়, তবু চলে যায় !

* * *

.....তবু প্রেম বলে,
“সত্যভঙ্গ হবে না বিধির। আমি তাঁর
পেয়েছি স্বাক্ষর-দেওয়া মহা অঙ্গীকার
চির-অধিকার লিপি।” তাই ক্ষীণবুদ্ধি
সর্বশক্তি মরণের মুখের সন্মুখে
দাঁড়াইয়া সুকুমার ক্ষীণ তনুসত্তা
বলে, “মৃত্যু তুমি নাই।”—হেন গর্ভকথা।
মৃত্যু হাসে বসি’। মরণ-পীড়িত সেই
চিরজীবী প্রেম আচ্ছন্ন করেছে এই

অনন্ত সংসার, বিষণ্ণ নয়ন'পরে
অশ্রুবাষ্পসম, ব্যাকুল আশঙ্কাভরে
চিরকম্পমান । * *

মেঠো সুরে কাদে যেন অনন্তের বাঁশি
বিশ্বের প্রান্তর-মাঝে ; গুনিয়া উদাসী
বসুন্ধরা বসিয়া আছেন এলোচুলে
দূরব্যাপী শস্ত্রক্ষেত্রে জাহ্নবীর কূলে
একখানি রোদ্রপীত হিরণ্য-অঞ্চল
বক্ষে টানি' দিয়া ; স্থির নয়নযুগল
দূর নীলাম্বরে মগ্ন ; মুখে নাহি বাণী ।
দেখিলাম তাঁর সেই স্নান মুখখানি
সেই দ্বারপ্রান্তে লীন, শুক্ল মন্মাহত
যোর চারি বৎসরের কণ্ঠাটির মতো !

ভাষার শাণিত দীপ্তিতে, সবল ছন্দোগতিতে, দৃষ্টির
পরিচ্ছন্নতায় ও অব্যর্থতায়, ভাবের দৃঢ়-সম্বন্ধতায়, রবীন্দ্রনাথের
শ্রেষ্ঠ সৃষ্টির যে এটি অন্যতম, সে-সম্বন্ধে কেউ ভিন্নমত পোষণ
করবেন কি না জানিনা ।

সোনার তরীর “পুরস্কার” কবিতাটির অনেক জায়গায়
কবি নিজের কথা এমন চমৎকার ভঙ্গিতে প্রকাশ
করেছেন, ছোটোখাটো সত্য এমন রসময় মূর্তি নিয়ে ফুটে
উঠেছে, যে, তা'রই জন্য এ-কবিতাটি চিরকাল পাঠকের হৃদয়রঞ্জ

করবে। এর বাণী-বন্দনাটি কত সুন্দর! কবি-প্রতিভার
ভিতরে যে একটি নির্লিপ্ততা বা আত্মসম্পূর্ণতা আছে, যার গুণে
কবি স্রষ্টা, তা'র কত মনোরম বর্ণনা কবি দিয়েছেন—

কে আছে কোথায়, কে আসে কে যায়
নিমেষে প্রকাশে নিমেষে মিলায়,
বালুকার পরে কালের বেলায়

ছায়া-আলোকের খেলা !

জগতের যত রাজা-মহারাজ
কাল ছিল যারা কোথা তা'রা আজ,
সকালে ফুটিছে সুখদুখ লাজ

টুটিছে সন্ধ্যাবেলা ।

তা'র মাঝে শুধু ধ্বনিতেছে সুর,
বিপুল বৃহৎ গভীর মধুর,
চিরদিন তাহে আছে ভরপুর

মগন গগনতল ।

যে জন শুনেছে সে অনাদি ধ্বনি
ভাসিয়ে দিয়েছে হৃদয়-তরলী,
জানে না আপনা, জানে না ধরলী,

সংসার-কোলাহল ।

* * *

বাজুক সে বীণা, মজুক ধরলী,
বারেকের তরে ভূলাও জননী,

কে বড় কে ছোটো কে দীন কে ধনী
কেবা আগে কেবা পিছে,

* * *

তুমি মানসের মাঝখানে আসি'
দাঁড়াও মধুর মুরতি বিকাশি',
কুন্দবরণ সুন্দর হাসি

বীণাহাতে বীণাপানি ।

ভাসিয়া চলিবে রবি শশী তারা,
সারি-সারি যত মানবের ধারা
অনাদি কালের পাশ্চ যাহারা

তব সঙ্গীত শ্রোতে !

দেখিতে পাইব ব্যোমে মহাকাল
ছন্দে ছন্দে বাজাইছে তাল,
দশ দিক্‌বধু খুলি' কেশজাল
নাচে দশদিক্ হ'তে ।

জগতের কি কাজে লাগতে কবির সাধ যায় সে-সম্বন্ধে কবি
বাণীর কাছে প্রার্থনা জানাচ্ছেন—

লক্ষবুগের সঙ্গীতে মাথা

সুন্দর ধরাতল ।

এ-ধরার মাঝে তুলিয়া নিনাদ
চাহিনা করিতে বাদ-প্রতিবাদ,

* * *

শুধু বাঁশিখানি হাতে দাও তুলি'
বাজাই বসিয়া প্রাণ-মন খুলি
পুষ্পের মতো সঙ্গীতগুলি

ফুটাই আকাশ-ভালে ।

অস্তর হতে আহরি' বচন
আনন্দলোক করি বিরচন,
গীত-রসধারা করি সিঞ্চন

সংসার-ধুলিজালে

*

*

*

ধরণীর তলে, গগনের গায়,
সাগরের জলে, অরণ্য-ছায়
আরেকটুখানি নবীন আভায়

রঙীন করিয়া দিব ।

সংসার-মাঝে দুয়েকটি সুর
রেখে দিয়ে যাবো করিয়া মধুর
দুয়েকটি কাঁটা করি দিব দূর

তা'র পর ছুটি নিব ।

সুখহাসি আরো হবে উজ্জল,
সুন্দর হবে নয়নের জল,
স্নেহ-সুধামাখা বাসগৃহতল

আরো আপনার হবে ।

প্রেয়সী নারীর নয়নে-অধরে,
আরেকটু মধু দিয়ে যাবো ভ'রে
আরেকটু স্নেহ শিশু-মুখপরে

শিশিরের মতো র'বে ।

রবীন্দ্রনাথের নিছক সৌন্দর্য্য-পূজার এ এক অসাধারণ সার্থকতা। তাঁর নিছক সৌন্দর্য্য-দৃষ্টির সামনেই মূর্তি ধ'রে উঠেছে কেমন আড়ম্বরহীন অথচ গভীর সত্য—অমৃতমাখা সত্য কাব্যের যা উপজীব্য। কবি এখানে মানুষের ছোটোখাটো কাজে লাগতে চেয়েছেন। একহিসাবে কাব্য মানুষের জীবনের এমন ছোটোখাটো কাজেই লাগে। কিন্তু আপাতদৃষ্টিতে যা মনে হয় সামান্য কাজ, মানুষের জীবনের জন্য তা যে সত্যিই অসামান্য।

সোনার তরীর ‘বসুন্ধরা’ কবিতাটি সুবিখ্যাত,—কাব্যরসিকের চির-আদরের সামগ্রী। চিরশ্যাম ধরণীর নিগূঢ় প্রাণরস কবির চিত্তকে একেবারে বিভোর ক'রে তুলেছে।

ওগো মা মৃগরি,
তোমার মৃত্তিকা-মাঝে ব্যাপ্ত হ'য়ে রই ;
দিগ্‌বিদিকে আপনারে দিই বিস্তারিয়া
বসন্তের আনন্দের মতো.....

.....হিল্লোলিয়া, মর্ম্মরিয়া,
কম্পিয়া, শ্বলিয়া, বিকিরিয়া, বিচ্ছুরিয়া,
শিহরিয়া, সচকিয়া, আলোকে-পুলকে
প্রবাহিয়া চ'লে যাই সমস্ত ভুলোকে
প্রাপ্ত হ'তে প্রাপ্তভাগে ;

এ-কবিতাটিতে বিশেষ লক্ষ্যযোগ্য “বিশ্বপ্রকৃতি”র সঙ্গে কবির পরম নিবিড় যোগ। মানুষের বিচিত্র জীবনযাত্রার সঙ্গে তাঁর যেটুকু সহানুভূতি জন্মেছে তা “আঘাত-সংঘাত”-পূর্ণ

মানুষের জীবনের সঙ্গে তেমন নয়, বিশ্বপ্রকৃতির সঙ্গে মানুষ যতখানি অবিচ্ছেদে যুক্ত তা'রই সঙ্গে । সেই আঘাত সংঘাত-পূর্ণ বিশ্বমানবের ক্ষেত্রে তাঁকে দণ্ডায়মান দেখতে পাই এর পরে 'চিত্রা' কাব্যে ।

সোনার তরীশেষের কবিতায় দিগন্তবিস্তৃত সৌন্দর্যাসাগরের বুকে কবির যে নিরুদ্দেশ যাত্রা অদ্ভুত তা'র সৌন্দর্য—

বলো দেখি মোরে শুধাই তোমায়,
অপরিচিতা,—

ওই যেথা জলে সন্ধ্যার কূলে
দিনের চিতা,

ঝলিতেছে জল তরল অনল,
গলিয়া পড়িছে অম্বরতল,
দিক্‌বধু যেন ছলছল-আঁধি

অশ্রুজলে,

হোথায় কি আছে আশ্রয় তোমার,
উন্নিমুখর সাগরের পার,
মেঘচূড়িত অন্তর্গিরির

চরণতলে ?

তুমি হাসো শুধু মুখপানে চেয়ে
কথা না ব'লে ।

এই নিরুদ্দেশ যাত্রাকে নিছক নিরুদ্দেশ যাত্রা কল্পনা ক'রে কাব্যরসিক আনন্দ পেতে পারেন ; আবার কারো-কারো মনে

হ'তে পারে, এই অপরিচিতার নয়নে রয়েছে রবীন্দ্রনাথের জীবন-দেবতার ছাতি ।

মোটের উপর সোনার তরীর ভাব আনন্দময়, রসতন্ময় দ্রষ্টার ভাব, কিছু বেশী সৌন্দর্য্যপ্রিয়তাও তা'তে আছে । কিন্তু শুধু এই-ই নয় । এই দৃষ্টির আনন্দ আর পরম সৌন্দর্য্যতন্ময়তার মধ্যেও জায়গায়-জায়গায় দেখছি, কি-এক গভীরতার জন্য কবির আকাঙ্ক্ষা জেগেছে । “সমুদ্রের প্রতি” কবিতায় কবি অনুভব করছেন—

.....মানব-হৃদয়সিক্ততলে

যেন নব মহাদেশ সৃজন হতেছে পলে-পলে
আপনি সে নাহি জানে, শুধু অর্ধ অনুভব তারি
ব্যাকুল করেছে তা'রে,.....
জননী যেমন জানে জঠরের গোপন শিশুরে
প্রাণে যবে স্নেহ জাগে, স্তনে যবে দুগ্ধ উঠে পূ'রে ।
প্রাণভরা ভাষাহারা দিশাহারা সেই আশা নিয়ে
চেয়ে আছি তোমাপানে ; তুমি সিক্ত প্রকাণ্ড হাসিয়ে
টানিয়া নিতেছ যেন মহাবেগে কি নাড়ীর টানে
আমার এ-মর্ম্মখানি তোমার তরঙ্গ-মাঝখানে
কোলের শিশুর মতো ;

‘ঝুলন’ কবিতাটিতে কবির চিন্তা যে বিষম দোল খাচ্ছে, সে শুধু খেয়ালের দোল নয়—

দে দোল দোল ।

দে দোল দোল ।

এ মহা সাগরে তুফান তোলা ।

বধূরে আমার পেয়েছি আবার

ভরেছে কোল ।

প্রিয়ারে আমার তুলেছে জাগারে

প্রলয়-রোল ।

বক্ষ-শোণিতে উঠেছে আবার,

কি হিল্লোল !

ভিতরে-বাহিরে জেগেছে আমার

কি কল্লোল..... ;

কবি নিজের হৃদয়-যমুনায় এমন-এক অতলস্পর্শ গভীরতা

অনুভব করছেন যার অন্য নাম তিনি দিয়েছেন মরণ—

যদি মরণ লভিতে চাও, এস তবে ঝাঁপ দাও

সলিল-মাঝে !

স্নিগ্ধ, শান্ত, সুগভীর, নাহি তল, নাহি তীর,

মৃত্যুসম নীল নীর স্থির বিরাজে..... ;

আর কবি নিজে তাঁর ‘আমার ধর্ম্য’ প্রবন্ধে বলেছেন—“বড়-

আমিকে চাওয়ার আবেগ ক্রমে আমার কবিতার মধ্যে যখন

ফুটতে লাগল, অর্থাৎ অকুররূপে বীজ যখন মাটি ফুঁড়ে

বাহিরের আকাশে দেখা দিলে, তা’রই উপক্রম দেখি, সোনার

তরীর বিশ্বনৃত্যে ।”—

বিপুল গভীর মধুর মন্দে
 কে বাজাবে সেই বাজনা
 উঠিবে চিত্ত করিয়া নৃত্য
 বিম্বিত হবে আপনা ।
 টুটিবে বন্ধ, মহা আনন্দ,
 নব সঙ্গীতে নূতন ছন্দ,
 হৃদয়-সাগরে পূর্ণচন্দ্র
 জাগাবে নবীন বাসনা ।

চিত্রা

এর পর চিত্রাতে দেখি, ‘দৃষ্টির আনন্দ’ আর ‘বাঁশির ব্যথা’
 যুগপৎ কবির সৃষ্টিতে চলেছে । “সুখ” কবিতায় তিনি বলেছেন—

আজি বহিতেছে

প্রাণে মোর শান্তিধারা ; মনে হইতেছে
 সুখ অতি সহজ সরল, কাননের
 প্রস্ফুট ফুলের মতো, শিশু আননের
 হাসির মতন.....

কিন্তু ‘সন্ধ্যায়’ কবি ব’সে-ব’সে ভাবছেন,—

ক্রমে ঘনতর হ’য়ে নামে অন্ধকার,
 গাঢ়তর নীরবতা,—বিশ্ব-পরিবার
 সুপ্ত নিশ্চেতন । নিঃসঙ্গিনী ধরণীর
 বিশাল অন্তর হ’তে উঠে সুগভীর
 একটি ব্যথিত প্রশ্ন—কিষ্ট ক্লান্ত সুর
 শূন্য-পানে—“আরো কোথা ?” “আরো কতদূর ?”

একদিকে কবির মোহন তুলিকাস্পর্শে উর্বরী জেগে উঠেছে—

যুগ-যুগান্তর হ'তে তুমি শুধু বিশ্বের প্রেমসী

হে অপূর্ণ শোভনা উর্বরী !

মুনিগণ ধ্যান ভাঙি, দেয় পদে তপস্তার ফল,

তোমারি কটাক্ষঘাতে ত্রিভুবন যৌবনচঞ্চল,

তোমার মদির গন্ধ অন্ধ বায়ু বহে চারিভিতে,

মধুমত্ত ভৃঙ্গসম মুগ্ধ কবি ফিরে লুক্ক চিতে,

উদ্দাম সঙ্গীতে ।

নুপুর গুঞ্জরি' যাও আকুল-অঞ্চলা

বিছাৎ-চঞ্চলা..... ;

আর-একদিকে 'এবার ফিরাও মোরে' কবিতায় যঁর চেহারা

কবির সামনে আসছে তাঁর সৌন্দর্য্য উর্বরীর সৌন্দর্য্য নয়—

মৃত্যুরে করি না শঙ্কা ! হৃদ্বিনের অশ্রুজল-ধারা

মস্তকে পড়িবে ঝরি'—তারি মাঝে যাবো অভিসারে

তা'র কাছে,—জীবনসর্ব্বস্বধন অর্পিয়াছি যারে

জন্ম-জন্ম ধরি' ! কে সে ? জানি না কে ! চিনি নাই তারে

শুধু এইটুকু জানি—তারি লাগি' রাত্রি অন্ধকারে

চলেছে মানবযাত্রী যুগ হ'তে যুগান্তর-পানে

.....শুধু জানি—যে শুনেছে কানে

তাহার আহ্বানগীত—ছুটেছে সে নির্ভীক পর্যাণে

.....দহিয়াছে অগ্নি তা'রে

বিদ্ধ করিয়াছে শূল, ছিন্ন তা'রে করেছে কুঠারে,

সর্বপ্রিয় বস্তু তা'র অকাতরে করিয়া ইন্দন
চিরজন্ম তারি লাগি' জ্বলেছে সে হোম হতশন ;—

*

*

*

অজিত-বাবু যে বলেছেন—সোনার তরী চিত্রা ও চৈতালির
মাধুর্য্যসম্পন্ন জীবনের সঙ্গে কথা কল্পনা ক্ষণিকা প্রভৃতি পরবর্তী
কাব্যের জীবনের যে বিচ্ছেদ সেটি এমন গুরুতর যে এ-দুটি দুজন
স্বতন্ত্র লেখকের জীবন বললেও অত্যাঙ্ক হয় না, একথা পুরোপুরি
মেনে নেওয়া যায় না। আমরা বরং দেখতে পাচ্ছি, কল্পনার
আগে একই-সঙ্গে আনন্দ আর ব্যথার উচ্ছ্বাসে ‘চিত্রা’ বিচিত্র
হ’য়ে দেখা দিয়েছে। সোনার তরীর নিবিড় রসানুভূতির মধ্যেও
যে এর আভাস বিদ্যমান, তাও আমরা দেখেছি।

আর রবীন্দ্র-প্রতিভার পক্ষে এটি খুবই স্বাভাবিক। অনুভূতি
যাঁর ভিতরে এত তীক্ষ্ণ, আর স্বভাবতই সন্ধান যাঁর ভিতরে এমন
অপ্রতিহত, নানা পরস্পরবিরোধী ভাবও তাঁর ভিতরে ওতপ্রোত
হ’য়ে থাকতে বাধ্য।

সোনার তরীতে দেখেছি, রবীন্দ্রপ্রতিভায় বান ডাকবার
উপক্রম হয়েছে। চিত্রাতে দেখেছি, সত্যি সে-বান ডেকেছে।
তাঁর প্রতিভার ঐশ্বর্য্য যেন সহস্র ছটায় বিচ্ছুরিত হচ্ছে।
স্বরসভাতলে উর্ব্বশীর নৃত্যের মতনই কি যে তা'র সৌন্দর্য্য তা'র
পুরোপুরি বর্ণনা দেওয়া অসম্ভব। *

* সোনার তরীর মাঝামাঝি থেকে ‘চিত্রা’র মাঝামাঝি পর্য্যন্ত এ জোয়ারের
স্থিতিকাল বয়ে বোধ হয় অনেকখানি বেশী নিভুল হয়।

চিত্রায় নানা ধরণের কবিতা স্থান পেয়েছে। নিছক সৌন্দর্য্য-পূজাহিসাবে “চিত্রা” “সুখ” অতি সুন্দর কবিতা। ‘সুখ’ কবিতায় সহজ সরল সুখ কবির ছন্দে কি সহজ সরল অথচ সবল ভাবে ফুটে উঠেছে। “জ্যোৎস্না রাত্রে” কবিতায় কবি কেমন-এক তৃষ্ণায় কাতর—নিদ্রাহীন। সৌন্দর্য্যের এক দিব্যমূর্ত্তি চাক্ষুষভাবে দেখবার জন্যে কবির মনে যে আকুলতা জেগেছে তা কেমন বিচিত্র হ’য়ে ফুটে উঠেছে। কবির এই রহস্য-অভিসারা মনোভাবের সঙ্গে খুব বেশী পাঠকের সহানুভূতি না হ’তে পারে ; কিন্তু তা’র জন্যে এর শিল্পগৌরব ম্লান হয় না। কবি অধিকারী হ’য়ে কাব্য লেখেন, পাঠকের বেলায়ও সেই অধিকারের কথা একেবারে ভুলে গেলে চলবে কেন।

এর ‘সন্ধ্যা’ কবিতাটি এক চমৎকার সৃষ্টি। কিন্তু সন্ধ্যার সৃষ্টি তত নয় যত কবির প্রতিভার এক সন্ধিক্ষণের সৃষ্টি।—এখানে বিশ্বপ্রকৃতির ক্ষেত্রের মাধুর্য্য থেকে চোখ একটু উঠিয়ে কবি দূরে বিশ্বমানবের ক্ষেত্রের “কত যুদ্ধ কত মৃত্যুর” ছবির দিকে দৃষ্টি নিক্ষেপ করেছেন।

এর পরই “এবার ফিরাও মোরে” কবিতাটি। রবীন্দ্র-প্রতিভা-নির্ধারণের এ আর-এক স্বপ্ন-ভঙ্গ। এর কয়েক লাইন উপরে উদ্ধৃত হয়েছে। এ কবিতাটি সম্বন্ধে বেশী-কিছু বলা নিম্প্রয়োজন। আমাদের জাতীয় জীবনের বর্তমান অবস্থায় এটি যে আমাদের প্রাণের বস্তু হবে, এ খুব স্বাভাবিক। কিন্তু কাব্য-

হিসাবেও এ অমূল্য। “মহাজীবনে”র জন্ম মানুষের আত্মায় মাঝে-মাঝে যে ক্রন্দন জাগে, তা’র কি অসাধারণ প্রকাশ এতে বর্তমান!

এর কাছাকাছি দাঁড় করানো যেতে পারে পরলোকগত সত্যেন্দ্রনাথের ‘মহাত্মা গান্ধী’-কবিতা।

রবীন্দ্রনাথের সৌন্দর্য্য-পূজার চরম সার্থকতা ‘উর্বশী’। কারো-কারো মতে এটি-ই রবীন্দ্রনাথের শ্রেষ্ঠতম সৃষ্টি। আমাদের ধারণা কি তা আগেই বলেছি। কিছু ভিন্ন ধরনের হ’লেও বায়রণের (Byron) সমুদ্র-বন্দনের সঙ্গে এই উর্বশী কবিতাটির কিছু সাদৃশ্য আছে। দুয়ের ভিতরেই সমুদ্রের কল্লোল আর তরঙ্গবিক্ষেপ কানে বাজে।

চিত্রার ‘বিজয়িনী,’ ‘পূর্ণিমা,’ ‘স্বর্গ হইতে বিদায়’ প্রভৃতিও সুন্দর কবিতা। কিন্তু ‘ব্রাহ্মণ’ ‘পুরাতন ভূত্য’ প্রভৃতি কবিতায় দেখছি, কবি বাস্তবিকই তাঁর সৌন্দর্য্যপূজার ‘অখিল মানসস্বর্গ’ ছেড়ে মাটির ধরণীর মহিমার পানে নির্ণাম্য দৃষ্টি নিক্ষেপ করেছেন।

“ব্রাহ্মণ” কবিতার বর্ণনভঙ্গী আর ছন্দোগতি খুব লক্ষ্যযোগ্য। কবির দৃষ্টি সূর্যের আলোর মতন পরিষ্কার অথচ অনাড়ম্বর। ছন্দোগতিতে সত্যকার ব্রাহ্মণেরই সংঘমের শুচিতা।

পুরাতন ভূত্যের মতন চমৎকার সৃষ্টি রবীন্দ্রনাথ তাঁর গল্পগুচ্ছে আরো করেছেন। এ-কবিতাটিতে বিশেষভাবে লক্ষ্যযোগ্য, এর অতি অনাড়ম্বর অথচ অতি অব্যর্থ শব্দপ্রয়োগ—

শু'নে মহা রেগে ছু'টে যাই বেগে
 আনি তার টিকি ধ'রে—
 বলি তা'রে, “পাজি, বেরো তুই আজি,
 দূর করে দিহু তোরে।”
 ধীরে চলে যায়, ভাবি, গেল দায় ;—
 পরদিন উঠে দেখি
 হুঁকাটি বাড়ায়ে রয়েছে দাঁড়ায়ে
 ব্যাটা বুদ্ধির ঢেঁকি।
 প্রসন্ন মুখ, নাহি কোনো দুখ,
 অতি অকাতর চিত্ত।
 ছাড়ালে না ছাড়ে, কি করিব তা'রে,
 মোর পুরাতন ভৃত্য।

“ব্যাটা বুদ্ধির ঢেঁকি” কথাটার গায়ে কি অমৃত মাখিয়ে দেওয়া হয়েছে !

অজিত-বাবু যে বলেছেন, চিত্রাতে আর চৈতালিতে রবীন্দ্র-
 নাথের কাব্যজীবনে খুব বড়-একটা সম্পূর্ণতা লাভ হয়েছে, সে
 সম্বন্ধে কোনো সন্দেহ নেই। চৈতালির সনেটগুলো বেশী
 প্রশংসাযোগ্য এইজন্যে যে, এর অনেকগুলোতে গভীর জ্ঞান
 অতি অল্প কথায় সুন্দর রূপ নিয়ে ফু'টে উঠেছে। কবির মানস-
 প্রকৃতি যে এখন কত সবল তা'র পর্যাপ্ত পরিচয় রয়েছে এই
 চৈতালির সনেটগুলোর ভিতরে।

এইবার চিত্রার ‘অসুখ্যামী,’ ‘জীবন-দেবতা’ প্রভৃতি সুবিখ্যাত কবিতা-সম্বন্ধে কিছু আলোচনা করবার সময় এসেছে। রবীন্দ্রনাথের ‘জীবন-দেবতা’কে নিয়ে তাঁর সমালোচকরা যথেষ্ট গোলমালে প’ড়ে গেছেন। আমাদের কাছে কিন্তু ব্যাপারটি তত গোলমালে ব’লে মনে হয় না। আমরা সোজা কথায় বলতে চাই, রবীন্দ্রনাথের জীবন-দেবতার অর্থ রবীন্দ্রনাথের প্রতিভা। অবশ্য প্রতিভা বললেই যে কথাটি খুবই পরিষ্কার ক’রে বলা হ’ল, তা নয়। তবে, এ-কথাটির সঙ্গে আমরা সবাই পরিচিত; আর আমাদের সবারই অল্পবিস্তর জানা আছে যে ‘অপূর্ব’, ‘অপরূপ’, ‘নবনবোন্মেষশালিনী’, এই সমস্ত হচ্ছে এর বিশেষণ।

ইতিহাসে দেখা যায়, প্রতিভাবানেরা প্রায়ই নিজেদের অন্তর্নিহিত শক্তি-সম্বন্ধে সজাগ। সর্বসাধারণের ভিড়ে তাঁরা যে বেমানুম খাপ খেয়ে যেতে পারেন না, এ-কথাটি নিজের-মনে তাঁরা ভালো-রকমই জানেন, আর নিজেদের অন্তর্নিহিত এই সত্যকে তাঁরা পরম যত্নেই লালন করেন। ‘মানসী’তে তা’র কিছু পরিচয় আমরা পেয়েছি। (নিন্দুকের প্রতি, পরিত্যক্ত, ইত্যাদি)। তাই আমাদের মনে হয়, রবীন্দ্রনাথ তাঁর অন্তরে-শায়িত এই অসাধারণত্বকে পরম যত্নে আর পরম বেদনায় বহন ক’রে আন্তে-আন্তে শেষে পূর্ণ যৌবনে অনেকটা পুরোপুরি দেখতে পেয়েছেন, কি তা’র স্বরূপ—

একি কোতুক নিত্য-নূতন

ওগো কোতুকময়ী!

আমি যাহা-কিছু চাহি বলিবারে
বলিতে দিতেছ কই ?

* * * *

নূতন ছন্দ অন্ধের প্রায়
ভরা আনন্দে ছু'টে চ'লে যায়,
নূতন বেদনা বেজে উঠে তার
নূতন রাগিণীভরে ।
যে-কথা ভাবিনি বলি সেই কথা,
যে-ব্যথা বুঝি না জাগে সেই ব্যথা,
জানি না এসেছি কাহার বারতা
কারে শুনার তরে ।

মানুষের ধর্ম, সভ্যতা, বিজ্ঞান, ইতিহাস সব-কিছুই এক
অদ্বুত অনুসন্ধান, —অন্ধের মতন মানুষ হাওড়িয়ে-হাওড়িয়ে
ধাক্কা খেয়ে-খেয়ে চলেছে এক পথ থেকে অন্য পথে, লক্ষ্য থেকে
লক্ষ্যান্তরে । বিশ্বমানবের সেই পরমরহস্যপূর্ণ বিরাট অনু-
সন্ধিৎসা এমন অল্পপরিসরে এই এসিয়ার এক-কোণের কবির
অন্তরে কেমন ক'রে সজীবতা লাভ করতে পারলে, সেই তত্ত্বকে
উদ্ঘাটিত করতে পারি এমন ক্ষমতা আমাদের নেই । রবীন্দ্র-
নাথকে যে বিশ্বকবি * অর্থাৎ বিশ্বভাবের কবি আখ্যা দেওয়া
হয়েছে, বাস্তবিকই তা অতিরঞ্জন নয় ।

* বিশ্বকবির অর্থ অর্থও আছে ; অর্থাৎ তিনিই বিশ্বকবি যিনি বিশেষ কোনো
জাতি বা দেশের দুঃখ ব্যথার কবি নন । এ কথাটি কতকটা অর্থহীন । “বিশেষ”কে
নিষেই কাব্য—তার উপর ‘বিশ্ব’র জাতি আপনা থেকে প্রতিফলিত হয় । একহিসাবে
সত্যাকার কবি-মাত্রকেই বলা যেতে পারে বিশ্বকবি অর্থাৎ বিশ্বের কবি ।

দ্বিতীয় পর্য্যায়

সোনার তরী চিত্রা ও চৈতালিতে কবিপ্রতিভার এক পূর্ণ, সৌন্দর্য্যতন্ময়, আত্মপ্রকাশের পর “কল্পনা”তে দেখি—কবির নূতন চেহারা। এমন-এক অবস্থার দ্বারদেশে কবি এসে দাঁড়িয়েছেন। যার পুরো পরিচয় তিনি অবগত নন, কিন্তু পিছনে-ফে’লে-আসা ঐশ্বর্য্যের পানে চেয়ে আর তিনি তৃপ্তি পাচ্ছেন না।

তাঁর এই অবস্থার ছবিটি কত সুন্দরভাবে ফুটে রয়েছে কল্পনার প্রথম কবিতাটিতে।

যদিও সন্ধ্যা আসিছে মন্দমস্তরে,
সব সঙ্গীত গেছে ইঙ্গিতে থামিয়া,
যদিও সঙ্গী নাহি অনন্ত অধরে,
যদিও ক্লান্তি আসিছে অঙ্গে নামিয়া,
মহা আশঙ্কা জপিছে মোন মস্তরে,
দিক্ দিগন্ত অবগুষ্ঠনে ঢাকা,
তবু বিহঙ্গ, ওরে বিহঙ্গ মোর,

এখনি, অন্ধ বন্ধ কোরো না পাখা।

এই “কল্পনা”-কাব্যখানিও যে কল্পনার সৌন্দর্য্যের দিক দিয়ে পাঠ করা না যায় তা নয় ; তবে সমগ্র রবীন্দ্র-কাব্য-সাহিত্যের সঙ্গে যাঁদের পরিচয় আছে তাঁরা এর ভিতরকার সাধক-হৃদয়টির খবর একটু বেশী না নিয়ে পারেন না। তা-ছাড়া, সাধক-রবীন্দ্র-নাথের গৌরব কবি-রবীন্দ্রনাথের গৌরবের চাইতে একটুও কম

নয়। তাই এই দ্বিতীয় পর্যায়ের রবীন্দ্রনাথের কাব্যলোচনার সঙ্গে-সঙ্গে তাঁর আধ্যাত্মিক সাধনার ক্রম একটু বুঝতে আমরা চেষ্টা করব।

প্রথম কবিতাটি আংশিক উদ্ধৃত হয়েছে। এর “ভ্রষ্ট লগ্ন” কবিতাটি অতি বিখ্যাত। যে বিফল প্রতীক্ষার ছবি কবি এঁকেছেন কি-এক শান্ত অথচ নিবিড় বেদনা তার অন্তরে!

ফাগুন যামিনী, প্রদীপ জলিছে ঘরে,
দখিন বাতাস মরিছে বুকের পরে।
সোনার খাঁচার ঘুমায় মুখরা শারী,
ছয়ার-সমুখে ঘুমায়ে পড়েছে দ্বারী।
ধূপের ধোঁয়ায় ধূসর বাসর-গেহ
অগুরু-গন্ধে আকুল সকল দেহ।
ময়ূরকণ্ঠি পরেছি কাঁচলখানি
দুর্বাশ্রামল আঁচল বক্ষে টানি’।
রয়েছি বিজন রাজপথপানে চাহি,
বাতায়ন-তলে রয়েছি ধূলার নামি—
ত্রিযামা যামিনী একা বসে গান গাহি,
“হতাশ পথিক, সে যে আমি, সেই আমি।”

এর “ভিখারী”, “বিদায়” প্রভৃতি কবিতায়ও এমনি বেদনার সুর বাজছে। কবির জীবন-যন্ত্রে যে নতুন সুর বাঁধা হচ্ছে, এ তা’রই বেদনা।

কিন্তু বেদনা-বোধই এ-কাব্যের শেষ কথা নয়। “অশেষ” কবিতায় সব বেদনা সরিয়ে রেখে কবি এক সুস্পষ্ট আহ্বান কানে শুনছেন—

মাঠের পশ্চিম শেষে অপরাহ্নে ঘান হেসে

হ’ল অবসান,

পরপারে উত্তরিতে পা দিয়েছি তরলিতে

আবার আহ্বান ?

তাঁর সমস্ত অবসাদ চূর্ণ ক’রে তাঁর জীবন-দেবতা বড়
নিশ্চয়মভাবে তাঁকে সামনে টানছেন !—

রে মোহিনী, রে নিষ্ঠুরা, ওরে রক্ত-লোভাতুরা

কঠোর যামিনী,

দিন মোর দিনু তোরে শেষে নিতে চা’স হ’রে

আমার যামিনী ?

এ-সব কথার সামনে শুধু কাব্যের সৌন্দর্য উপভোগের
আকাঙ্ক্ষা আপনা থেকে সঙ্কুচিত হ’য়ে যায়। যে কবি-কীর্তি
নিরে সাধারণতঃ কোনো বড় কবি নিজেকে অগৌরবাস্থিত মনে
করবেন না, তা’রই শীর্ষে দাঁড়িয়ে ইনি বলছেন—“শেষে নিতে
চা’স হ’রে আমার যামিনী ?”—বারবার এমন নিশ্চয়ম আঘাত
লাভ করবার সৌভাগ্য কত অল্প লোকের জীবনে ঘটে !

কিন্তু সব-চাইতে লক্ষ্যযোগ্য এর “বর্ষশেষ” কবিতাটি।
ঝড়ের বর্ণনা হিসাবেও এ-কবিতাটি সুন্দর। ঝড়ের আয়োজন
তার প্রকৃতি তার ক্রন্দন তার উল্লাস আর শেষে তার বিরতি

অদ্ভুত ছন্দোবন্ধে আত্মপ্রকাশ করেছে। কিন্তু কবির আত্মার যে আগুন এর ভিতরে দাউ-দাউ ক'রে জ্বলে উঠেছে, কি ছার ঝড়ের সৌন্দর্য্য তা'র কাছে! “এবার ফিরাও মোরে” প্রভৃতি কবিতায় দেখেছি, কবির অন্তরে শায়িত “মহাজীবন” সচেতন হ'য়ে উঠেছে। এই “বর্ষশেষ” কবিতায় দেখছি, তাঁর যে দ্বিধা-সঙ্কোচ ও অবসাদটুকু এখনো বাকি আছে, তা যেন ছিন্ন-ভিন্ন হ'য়ে যাচ্ছে! যাঁর দর্শনে তাঁর এত দিনের প্রতীক্ষা অসাধারণভাবে সার্থক হয়েছে আশ্চর্য্য তাঁর রূপ! কবি তাঁকে প্রণাম নিবেদন করছেন এই ভাবে :—

হে হৃদয়, হে নিশ্চিত, হে নূতন নিষ্ঠুর নূতন,
সহজ প্রবল।

জীর্ণ পুষ্পদল যথা ধ্বংস ভ্রংশ করি চতুর্দিকে
বাহিরায় ফল—

পুরাতন পর্ণপুট দীর্ণ করি বিকীর্ণ করিয়া
অপূর্ব আকারে

তেমনি সবলে তুমি পরিপূর্ণ হয়েছ প্রকাশ—
প্রণমি তোমারে।

প্রত্যেকটি বিশেষণ, প্রায় প্রত্যেকটি শব্দ, এখানে যে নতুন-নতুন অর্থ প্রকাশ করেছে, অভিধানে তা'র কতটুকু পাওয়া যায়! “অনুভব” যে না করতে চায়, সেই বা তা'র কতটুকু গ্রহণ করতে পারে!

কিন্তু আশ্চর্য্য এর শক্তি ! একেবারে বন্ধ-হৃদয় ভিন্ন হয়ত কথাগুলো আর কান্নো কাছ থেকেই ব্যর্থ হ'য়ে ফি'রে যাবে না ।

শেলির Ode to The West Wind-এর সঙ্গে এই কবিতাটি মিলিয়ে পড়া যেতে পারে । দুই কবিতায়ই বড় প্রবল আকারে দেখা দিয়েছে । কিন্তু শেলি বড়কে বলছেন—

Be through my lips to unawakened earth

The trumpet of a prophecy !

আর রবীন্দ্রনাথ বলছেন—

লাভ-ক্ষতি টানাটানি, অতি সুন্দর ভগ্ন অংশ ভাগ,

কলহ সংশয়,

সহে না সহে না আর জীবনের খণ্ড খণ্ড করি'

দণ্ডে দণ্ডে ক্ষয়

* * * *

শ্রেনসম অকস্মাৎ ছিন্ন ক'রে উর্দ্ধে ল'য়ে যাও

পঙ্ক-কুণ্ড হ'তে,

মহান্ মৃত্যুর সাথে মুখামুখি ক'রে দাও মোরে

বজ্রের আলোতে ।

“বর্ষশেষ” “বৈশাখ” প্রভৃতি কবিতায় “মহাজীবনে”র (কবির ভাষায় “বড়-আমি”র) ‘তপঃক্লিষ্ট’ সুষমা চোখ ভ'রে দেখে নেবার পর কবির ভবিষ্যৎ তাঁর চোখে কি চেহারা নিয়ে দাঁড়িয়েছে “রাত্রি” কবিতাটিতে তার ইঙ্গিত রয়েছে—

তোমার তিমির-তলে যে বিপুল নিঃশব্দ উদ্যোগ
 অমিতেছে জগতে জগতে
 আমারে তুলিয়া লও সেই তা'র ধ্বজচক্রহীন
 নীরব-ঘর্ষর মহারথে ।

বড় মহিমামণ্ডিত ধ্যান-গন্তীর মূর্ত্তি কবির মনে জেগে উঠেছে—
 স্তম্ভিত তমিস্রপুঞ্জ কম্পিত করিয়া অকস্মাৎ
 অন্ধরাত্রে উঠেছে উচ্ছ্বাসি'
 সত্ত্বক্ষুট ব্রহ্মমন্ত্র আনন্দিত ঋষিকণ্ঠ হতে
 আন্দোলিয়া ঘন তজ্জ্বালাশি ।
 পীড়িত ভুবন লাগি' মহাযোগী করুণাকাতর
 চকিতে বিদ্যুৎ রেখাবৎ
 তোমার নিখিল-লুপ্ত অন্ধকারে দাঁড়িয়ে একাকী
 দেখেছে বিধের মুক্তি-পথ ।

তাঁর কল্পনাও কত মহিমামণ্ডিত হ'য়ে উঠেছে ! এই রাত্রিকেই
 তিনি বলেছেন—

নক্ষত্র-রতন-দীপ্ত নীলকান্ত স্মৃতি-সিংহাসনে
 তোমার মহান্ জাগরণ ।

বাস্তবিক রবীন্দ্র-প্রতিভার এই-এক আশ্চর্য্য ক্ষমতা আমরা
 উপলব্ধি করি যে, তিনি নিজের চেতনা দিয়ে সর্বমানবের পরম-
 সূক্ষ্ম চেতনার সঙ্গেও আত্মীয়তা করবার, আর তাঁর ললিত কণ্ঠে
 সে-সব প্রকাশ করবার, এক অসাধারণ ক্ষমতা রাখেন । অবশ্য
 কবিপ্রতিভার অর্থই কতকটা তাই—বিশেষ করে গীতি-কবি-

প্রতিভার। কিন্তু রবীন্দ্রনাথের সেই গীতি-কবি-প্রতিভারও এক পরম অসাধারণ বিকাশই দেখতে পাই। নবীন প্রেমিক-প্রেমিকার আশা-সুখ-ব্যথা নিবিড় হ'য়েই ঝাঁর বাঁশীতে এক কালে বেজেছিল, তিনিই এখন বাজাচ্ছেন মহাযোগীর পরম নিগূঢ় বেদনার সুর!—আর এইই তাঁর বাঁশীর শেষ সুর নয়!

রবীন্দ্রনাথ যে কবি-শেখরের মুখে নিজের রচনা-সম্বন্ধে বলেছেন, “আমার এসব জিনিষ বাঁশীর মতো—বুঝবার জন্মে নয়, বাজবার জন্মে,” তাঁর কাব্য-সম্বন্ধে এর চাইতে সুন্দর বর্ণনা আর দেওয়া যায় না। বুঝবার কথা নিশ্চয়ই তাঁর কাব্যে ঢের আছে; কিন্তু সব বোঝা, সব জ্ঞান, আনন্দ, বিবাদ, প্রেম, নৈরাশ্য, সাধনা,—এ-সমস্তের অতি ক্ষুদ্রতম কথাও, তাঁর কাব্যে কেমন বাঁশির সুরের নিবিড়তা আর অব্যর্থতা নিয়েই বাজে! “ক্ষণিকা”র সময় থেকে তাঁর এ-ক্ষমতায় যে অপূর্বতা জেগেছে—গীতবাক্যের অপূর্বতা জেগেছে—এক হাফেজ ছাড়া আর কোনো গীতি-কবির ভিতরে সেটি প্রত্যক্ষ করবার সৌভাগ্য আমাদের হয়নি।

কথা

“কল্পনা”র যে সহজ প্রবল সত্যের রূপ কবির চোখ ধঁধে দিলে, “কথা” কাব্যে দেখছি—তা'রই সঙ্গে কবির বার-বার মুখোমুখি হচ্ছে। ভারতের পুরাণে ইতিহাসে ঝাঁরা জীবনের রহস্যোদ্ঘাটনের তপস্যা করেছেন, ক্ষুদ্র স্বার্থের কারাগারে বদ্ধ

হ'য়ে পলে-পলে যে নিদারুণ আত্মহত্যা, তা'র হাত থেকে উদ্ধার করে ক্ষতির, ত্যাগের, সময়-সময় মৃত্যুর, রাজটীকা পরিয়ে জীবনকে যারা সুন্দর করেছেন, তাঁদের দৃষ্টান্ত এক নূতন মহিমা নিয়ে কবির সামনে দাঁড়িয়েছে। * অতীত তাঁর কাছে আর অতীত নয়। অতীত ইতিহাসে দীপ্যমান দেখছেন যে “মহাজীবন” তা'রই স্পন্দন কবি নিজের ভিতরে অনুভব করতে পারছেন বলেই এর অল্প কিছু কাল পরের একটি কবিতায় অতীতকে বলতে পেরেছেন

কথা কও কথা কও।

স্তব্ধ অতীত হে গোপনচারী,

অচেতন তুমি নও—

“কথা” কাব্যখানির প্রায় সব কবিতাই সুন্দর। “প্রতি-পাড়ে”রই মহিমা আছে; তা'র উপর লেখক অসাধারণ কুশলী; কাজেই “প্রবন্ধ” “মহত্তর” ত হবেই। রবীন্দ্রনাথের এই কাব্য-খানি বোধ হয় সব চাইতে বেশী জনপ্রিয়।

গাথা (Ballad) হিসাবে এর শেষের দিকের কবিতাগুলিই (অপমান বর, স্বামী লাভ, বন্দী বীর, নকল গড়, হোরি খেলা, বিবাহ ইত্যাদি) উৎকৃষ্ট। আর এসমস্তের মধ্যে ‘হোরি খেলা’ কবিতাটি অতি উঁচু দরের Ballad. Ballad-এর বিশেষত্ব তা'র সবল সরলতায়। এই জিনিষটিই এই কবিতায় পূরোপুরি দেখতে

পাওয়া যায় । আর এর ছন্দ বড় সুন্দর—যোদ্ধার হোরি খেলার
ছন্দই বটে ।

পত্র দিল পাঠান কেসর খাঁরে

কেতুন হ'তে ভুনাগ রাজার রানী,—

লড়াই করি আশ মিটেছে মিঞা ?

বসন্ত যায় চোখের উপর দিয়া,

এস তোমার পাঠান সৈন্ত নিয়া—

হোরি খেলব আমরা রাজপুতানী ।

যুদ্ধে হারি' কোটা-সহর ছাড়ি'

কেতুন হতে পত্র দিল রানী ।

কিন্তু 'কথার' পরিশোধ কবিতাটিই হয়ত এর সর্বশ্রেষ্ঠ
কবিতা—রবীন্দ্রনাথের সর্বশ্রেষ্ঠ কবিতাসমূহের অন্যতম । এই
কবিতা সংস্পর্শে নীতির কথা কেউ তুললে আশ্চর্য্য হবো না ;
এর বিশেষত্বও সেইখানেই । কবি-দৃষ্টি যে কি অসাধারণ, প্রায়
সর্বভেদী, প্রচলিত নীতি-রুচি মত-বিশ্বাস ইত্যাদির স্থূলতা সে
দৃষ্টির সামনে যে কেমন ছিন্নভিন্ন হয়ে যায়, সত্য আপনার উলঙ্গ
মহিমায় সুপ্রকট হয়, এ কবিতাটিতে তার আশ্চর্য্য পরিচয়
রয়েছে । এর যে-জায়গায় শ্যামা বলছে—

.....বালক কিশোর

উত্তীয় তাহার নাম, ব্যর্থ প্রেমে মোর

উন্মত্ত অধীর । সে আমার অনুনয়ে

তব চুরি-অপবাদ নিজ স্বন্ধে লয়ে

দিয়েছে আপন প্রাণ । এ জীবনে মম
সর্বাধিক পাপ মোর, ওগো সর্বোত্তম,
করেছি তোমার লাগি' এ মোর গৌরব ।—

সেখানে বজ্রসেন যদি—

কি কহিলি পাপিয়সী.....

.....চাহি না আর তোরে

বলে' নাটকীয় ভঙ্গিতে পদাঘাত করে চলে যেত আর
সেখানেই যবনিকা পতন হ'ত, তা'হলে এক শ্রেণীর সমবাদারদের
কাছ থেকে হয়ত হাততালির আর অন্ত থাক্ত না । কিন্তু
কবির প্রাণপুরুষ লজ্জার দুঃস্বপ্ন ভারে পিষ্ট হ'য়ে যেত ।—
মূলদৃষ্টি যে সেই কেবল জানে, পাপ আর পুণ্য দুই সম্পূর্ণ স্বতন্ত্র
বস্তু । দৃষ্টিমান প্রতাপ করে, ভালো-মন্দ পাপ-পুণ্য সমস্তের
ভিতর দিয়ে চলেছে মানুষেরই জয়যাত্রা । সে যাত্রা-পথে, মোহ-
দুর্বলতার সহস্র কুশাক্ষরে নিত্য বিদ্ধ মানুষের চরণতল ;
মানুষের সে-বেদনা পরম দরদী কবি যদি না বুঝবেন তবে আর
বুঝবে কে ?*

ক্ষণিকা

“কল্পনা”র কবি-হৃদয়ের যে-বেদনা উপলব্ধি করেছি, ‘কথা’র
মহাজনদের অমৃতস্পর্শ লাভ ক'রেও কবির অন্তরের সে বেদনা
প্রশমিত হয়ে যায়নি । কিন্তু এই ক্ষণিকা কাব্যে সে-বেদনা

*Dante-এর Divine Comedyর Francesca ও Paoloর অতি করুণ কাহিনী

এই সম্পর্কে স্মরণীয় ।

রয়েছে নীচে। সেই ব্যথার মৃণালের উপর তাঁর প্রতিভাপদ্ম
যে-ভাবে পাপড়ি খুলে দাঁড়িয়েছে অপূর্ব তার সৌন্দর্য আর
সৌরভ। ব্যথা, বিবেচনা, সমস্তা, সন্ধান—সব সরিয়ে দিয়ে
ক্ষণ-প্রকাশের বুকে মুহূর্তে মুহূর্তে যে-অমৃত ফুটে উঠছে কবি তাই
চোখ ভরে দেখছেন, আর প্রাণ ভরে উপভোগ করছেন—

ওরে থাক থাক কাদনি !

ছই হাত দিয়ে ছিঁড়ে ফেঁলে দেরে

নিজ হাতে বাঁধা বাঁধনি !

যে সহজ তোর রয়েছে সমুখে

আদরে তাহারে ডেকে নেরে বুকে,

আজিকার মতো যাক্ যাক্ চুকে

যত অসাধ্য সাধনি !

ক্ষণিক সুখের উৎসব আজি,

ওরে থাক থাক কাদনি !

প্রকাশ-ভঙ্গিমা কত শানিত !—এপর্যন্ত রবীন্দ্রনাথ যত
কাব্য লিখেছেন তা'র মধ্যে নিছক গীতিকবিতা হিসাবে এই
ক্ষণিকার কবিতাগুলি আমাদের কাছে সর্বশ্রেষ্ঠ বলে মনে হয়।
সরল চটুল ভঙ্গীতে কবি কথা বলছেন, অথচ তা'রই ফাঁকে-ফাঁকে
কবি-হৃদয়ের অন্তস্তলে চেয়ে দেখবার সুযোগ আমাদের যখন
ঘটছে তখন দেখতে পাওয়া যাচ্ছে, কি গভীরতা থেকে তাঁর
কথা উৎসারিত, আর অনেক সময়েই কেমন বেদনাভরা সেই
গভীরতা।

ওমর খৈয়ামের সঙ্গে এখানে রবীন্দ্রনাথের তুলনা চলে। তবে ওমরের মতো জীবনের অতি গুরুতর সমস্যাগুলোর কোনো মীমাংসা করতে না পেরে “ভাগ্য-দেবীর ক্রুর পরিহাস পেয়াল ভ’রে ভুলবার” চেষ্টাই এখানে কবির সবখানি কথা নয়। এখানে রবীন্দ্রনাথের দৃষ্টি-ভঙ্গিমার বেশী মিল বরং হাফেজের সঙ্গে।

কণিকার বহু পরে শিশু ভোলানাথ প্রভৃতি কাব্যে কবির “সহজ”র সাধনা পূরোপুরিই আমরা দেখতে পাই। এই কণিকায় তার’ই পূর্বসূচনা। সত্যকে সব বাহুল্যের আবর্জনা থেকে মুক্ত করে এমন সহজরূপে প্রকাশ করবার ক্ষমতা এর আগে রবীন্দ্রনাথে দেখা যায়নি। কণিকায় এর সামান্য আভাস আছে; কিন্তু কণিকায় সহজ সুন্দরের লীলা যে ভাবে দলের পর দলে খুলে যেতে চাচ্ছে, বাস্তবিকই তা অপূর্ব। প্রকৃতির সৌন্দর্য্য বর্ণনায়ও কবির এই সহজ ভঙ্গী—

আমি ভালোবাসি আমার

নদীর বালুচর,

শরৎকালে যে নির্জনে

চখাচখির ঘর।

যেথায় ফুটে কাশ

তটের চারি পাশ

শীতের দিনে বিদেশী সব

হাঁসের বসবাস।

কচ্ছপেরা ধীরে
রৌদ্র পোহায় তীরে
হু'একখানি জেলের ডিঙি
সন্ধেবেলায় ভিড়ে ।

ক্ষণিকার 'মাতাল' কবিতাটি বিখ্যাত । জীবনের সব
জটিলতা, দুর্ভাবনা, সরিয়ে দিয়ে হৃদয়াবেগের সহজ পথে চলার
যে সত্য কবির চোখে ফুটে উঠতে চাচ্ছে, তাই-ই স্বাক্ষর দিয়ে
উঠেছে এই কবিতায়—

পাড়ার যত জ্ঞানী গুণীর সাথে
নষ্ট হ'ল দিনের পর দিন,
অনেক শিখে পক হ'ল মাথা,
অনেক দেখে দৃষ্টি হ'ল ক্ষীণ,
কত কালের কত মন্দ ভালো
ব'সে ব'সে কেবল জমা করি,
ফেলা-ছড়া ভাঙা-ছেঁড়ার বোঝা
বুকের মাঝে উঠছে ভরি' ভরি,
গুঁড়িয়ে সে-সব উড়িয়ে ফেলে দিক্
দিক্-বিদিকে তোদের ঝোড়ো হাওয়া !
বুঝেছি ভাই সুখের মধ্যে সুখ
মাতাল হ'য়ে পাতাল পানে ধাওয়া ! *

* মা দর পিয়ালে আকসে রোখে ইয়ার দিদারেন । আর বেখবর জেলজুতে গুরবে
মুদামে মা ॥ হাকেক ॥ আমাদের নিরস্তর-পান-সুখে ওগো বঞ্চিত, শোনো, আমরা
আমাদের পেরালার ভিতরে প্রিয়তমের মুখ প্রতিবিম্বিত দেখেছি ।

যুগল কবিতাটিতে সত্যের সন্ধান কি অব্যর্থ ! জায়গায়
জায়গায় Browning-এর The Last Ride Together মনে
করিয়ে দেয়—

স্বয়ং যদি আসেন আজি হারে
মানব নাক রাজার দারোগারে,—
কেল্লা হ'তে ফোজ সারে সারে

দাঁড়ায় যদি গুঁচায় ছোঁরাছুরি,
বল্ব, রে ভাই, বেজার কোরো নাকো,
গোল হতেছে একটু থেমে থাকো,
রূপাণ-খোলা শিশুর খেলা রাখো

ক্ষাপার মতো কামান-ছোঁড়াছুঁড়ি !
একটুখানি সরে' গিয়ে করো
সঙের মতো সঙীন্ ঝমঝমর,
আজকে শুধু একবেলারই তরে
আমরা দৌহে অমর দৌহে অমর !

হৃদয়ের আবেগ যে অসত্য নয়, সৌন্দর্যের উপলব্ধির যে
কোন সত্যের কাছেই মাথা হেঁট করবার প্রয়োজন করে না
'অতিবাদ' কবিতাটিতে কত স্বচ্ছন্দচিত্তে কবি সে কথা বলতে
পারছেন—

আজ বসন্তে বিশ্বখাতায়
হিসেব নেইক পুষ্পে পাতায়,
জগৎ যেন ঝাঁকের মাথায়
সকল কথাই বাড়িয়ে বলে,

রবীন্দ্রকাব্যপাঠ

* * *

প্রিয়ার পুণ্যে হলেম রে আজ
একটা রাতের রাজ্যাধিরাজ,
ভাঙারে আজ কর্চে বিরাজ

সকল প্রকার অজস্র !

কেন রাখব কথার ওজন ?

রূপণতায় কোন্ প্রয়োজন ?

ছুটুক বাণী যোজন যোজন

উড়িয়ে দিয়ে যত্ন গত !

হাফেজের দিউয়ান খাঁদের প্রিয় তাঁরা ‘ক্ষণিকা’র এইরকম
বহু কবিতায় তা’র স্বাক্ষর অনুভব করবেন। কিন্তু দুয়ের
পার্থক্যও লক্ষ্য করবার যোগ্য। মিলনের যে সৌন্দর্য্য, আবেগ,
আনন্দ, তাই দিউয়ানের স্থায়ী ভাব। ক্ষণিকায়ও মাঝে মাঝে
এসব চিকমিক ক’রে ওঠে। কিন্তু একে অপূর্ব করেছে, এর সব
সৌন্দর্য্য-বোধ, আবেগ, আর স্ফূর্তির তলদেশে লুকায়িত যে
বেদনা। কতকগুলো কবিতায় দেখা যাচ্ছে, কবি সে-বেদনা
আর লুকিয়ে রাখতে পারছেন না—

গভীর সুরে গভীর কথা

শুনিয়ে দিতে তোরে

সাহস নাহি পাই।

মনে মনে হাসি কি না

বুঝব কেমন ক’রে ?

আপনি হেসে তাই

শুনিয়ে দিয়ে যাই ;
ঠাট্টা ক'রে ওড়াই সখি
নিজের কথাটাই ।
হাল্কা তুমি করো পাছে
হাল্কা করি ভাই
আপন ব্যথাটাই ।

আর পরামর্শ কবিতায় কবির অশ্রু যেন আর রোধ মান্তে
চাচ্ছে না ।—

অনেক বার ত হাল ভেঙেছে,
পাল গিয়েছে ছিঁড়ে,
ওরে দুঃসাহসী !
সিক্ত পানে গেছি স্ ভেসে
অকুল কালো নীরে—
ছিন্ন রসারসি ।
এখন কি আর আছে সে বল ?
বুকের তলা তোর
অরে উঠছে জলে ।
অশ্রু সঁচে চলবি কত
আপন ভারে ভার
তলিয়ে যাবি তলে ।

কবি নিজেকে সমঝাচ্ছেন, এখন না হয় তরী ঘাটেই বাঁধা
থাকুক, আর কাজ কি দুঃসাহসে ভর করে নতুন যাত্রা করা ?

এবার তবে ক্ষান্ত হ'রে

ওরে শ্রান্ত তরী ।

রাখ রে আনাগোনা ।

বর্ষ-শেষের বাশি বাজে

সন্ধ্যা গগন ভরি'

ঐ যেতেছে শোনা ।

কিন্তু মিছে প্রবোধ দেওয়া—

হায়রে মিছে প্রবোধ দেওয়া,

অবোধ তরী মম

আবার যাবে ভেসে ।

কর্ণ ধ'রে বসেছে তা'র

যমদূতের সম

স্বভাব সর্বনেশে ।

ঝড়ের নেশা ঢেউয়ের নেশা

ছাড়বে নাকো আর,

হায় রে মরণ-লুভী ।

ঘাটে সে কি রৈবে বাঁধা,

অদৃষ্টে যাহার

আছে নৌকা-ডুবি ।

এর সঙ্গে “এবার ফিরাও মোরে” কবিতা মিলিয়ে পড়লে
এর বিশিষ্টতা সহজেই অনুভব করা যায় । ‘এবার ফিরাও
মোরে’ কবিতায় রয়েছে দূর থেকে কবি যে মৃত্যুভীষণ মহাজীবনের
কল্লোল শুনতে পেয়েছেন তারই ছন্দ । তাই বলেছি, এ তাঁর

প্রতিভা-নির্ঝরের আর-এক স্বপ্নভঙ্গ। কিন্তু সে জীবন-পথে
বহু দূর এগিয়ে কাঁব যে বিষম “আকর্ষণ” অনুভব করছেন, সেই
সর্বনাশা আকর্ষণের টানে সামনে চলতে যে অদ্ভুত আশঙ্কা ও
বেদনা কবির চিত্তে জাগছে, তারই অপরূপ ছবি ফুটে উঠেছে
এই কবিতায়! হাফেজও বলেছেন,

...ইশক আসান নমুদ আউয়ল
ওলে উফ্তাদা মোশ্কেল্ হা।*

শবে তারীখ ও বীমে মওজ
ও গিরদ আবে চনিন হায়েল।
কুজা দানন্দ হালে মা
সুবুক সারানে সাহিল হা।†

কবির প্রেম সাধনার এখন কি অবস্থা তার নির্দেশ
রয়েছে এর শেষের দিকের “অন্তরতম” কবিতায়—

আমি যে তোমায় জানি, সে ত কেউ
জানে না।
তুমি মোর পানে চাও, সে ত কেউ
মানে না।

* প্রথমে প্রেম বড় আরামের মনে হয়েছিল, কিন্তু শেষে দেখছি মুশকিল
এসে পৌঁছেছে।

† অন্ধকার রাত, উন্মিসংঘাত, ঘূর্ণাবর্ত্তও তুমুল গর্জে,
বেলায় বাস বার বুঝবে ছাই তার পথের ক্রেশ মোর সমুদ্রর যে।

—কবি নজরুল ইসলামের অনুবাদ।

মোর মুখে পোয়ে তোমার আভাস
কত জনে কত করে পরিহাস,
পাছে সে না পারি সহিতে
নানা ছলে তাই ডাকি যে তোমায়,
কেহ কিছু নারে কহিতে ।

তোমার পথ যে তুমি চিনিয়েছ
সে কথা বলিলে কাহারে ।
সবাই ঘুমালে জনহীন রাতে
একা আসি তব দ্বারে ।
স্তব্ধ তোমার উদার আলয়,
বীণাটি বাজাতে মনে করি ভয়,
চেয়ে থাকি শুধু নীরবে ।
চকিতে তোমার ছায়া দেখি যদি
ফিরে আসি তবে গরবে ।

প্রভাত না হতে কখন আবার
গৃহ-কোণ মাঝে আসিয়া,
বাতায়নে বসে বিহ্বল বীণা
বিজনে বাজাই হাসিয়া ।
পথ দিয়া যেবা আসে যেবা যায়
সহসা ধমকি চমকিয়া চায়,
মনে করে তারে ডেকেছি ।
জানে না ত কেহ কত নাম দিয়ে
এক নামখানি ঢেকেছি ।

বেশ বুদ্ধিতে পারা যাচ্ছে, পূর্বরাগের পালা শেষ, কবির চিত্ত এখন অনুরাগের রাঙা রাখীতে বাঁধা পড়ে' গেছে।

এ ভিন্ন অন্য ধরনের কবিতাও ক্ষণিকায় আছে, আর কবির অভিনব বর্ণন-ভঙ্গীতে তারও অধিকাংশই সুন্দর কবিতা। এর বর্ষার কবিতাগুলি খুবই চমৎকার। বর্ষার অনেক সুন্দর কবিতা রবীন্দ্রনাথ লিখেছেন। তার মধ্যেও মানসী, সোনার তরী, আর ক্ষণিকার, বর্ষার কবিতা লক্ষ্যযোগ্য। বাস্তবিকই যেন কাজল মেঘের ছায়া পড়েছে এইসব কবিতার উপর। আর তাই তাদের চেহারায় কেমন তৃণপল্লবেরই নবীনতা।

ওগো আজ তোরা যাস্নে গো তোরা
 যাস্নে ঘরের বাহিরে
 আকাশ আঁধার বেলা বেশী আর নাহিরে।
 ঝরঝর ধারে ভিজিবে নিচোল,
 ঘাটে যেতে পথ হয়েছে পিছল,
 ওই বেণুবন ছলে ঘনঘন
 পথ পানে দেখ্ চাহিরে।

ওগো আজ তোরা যাস্নে ঘরের বাহিরে।

(ক্ষণিকার “নববর্ষা” কবিতাটি খুবই বিখ্যাত। এর সে খ্যাতি কোনোদিন যে ম্লান হবে তা মনে হয় না। Nightingale-এর গান শুনে যে আনন্দে Keats বলেছিলেন, My heart aches সেই অবশ-করা আনন্দের অনুভূতি রয়েছে এর ভিতরে; আর

সেই আনন্দের গুরু ভারে ছন্দ বোঝাই নৌকার মতো কেমন
ধিমিয়ে ধিমিয়ে চলেছে—

হৃদয় আমার নাচেরে আজিকে
ময়ূরের মত নাচে রে
হৃদয় নাচেরে ।

শত বরণের ভাব উচ্ছ্বাস
কলাপের মতো করেছে বিকাশ ;
আকুল পরাণ আকাশে চাহিয়া
উল্লাসে করে যাচে রে ।

হৃদয় আমার নাচে রে আজিকে
ময়ূরের মতো নাচেরে ।

গুরু গুরু মেঘ গুমরি গুমরি
গরজে গগনে গগনে
গরজে গগনে ।

ধেয়ে চলে আসে বাদলের ধারা,
নবীন ধাতু ছলে ছলে সারা,
কুলায়ে কাঁপিছে কাতর কপোত,
দাছরি ডাকিছে সঘনে ।

গুরু গুরু মেঘ গুমরি' গুমরি'
গরজে গগনে গগনে ।

এর ক্ষতিপূরণ, প্রতিজ্ঞা, পথে, কবি, সোজাসুজি, একগাঁয়ে
প্রভৃতি খুবই লক্ষ্যযোগ্য কবিতা । কবির সহজের সাধনার কথা
আগেই বলা হয়েছে ; কত গভীর আর জটিল কথাও সহজ

আর চটুল ভঙ্গিতে কবি প্রকাশ করতে পারেন এসবে তারই প্রচুর পরিচয় রয়েছে। বেশ হাল্কা ভাবেও এগুলো পড়া যেতে পারে; কিন্তু কবির দিকে একটুখানি স্থির দৃষ্টিতে চাইলেই বুঝতে পারা যায়, স্ফূর্তিবাক্য তাঁকে যতই মনে হোক, আসলে, সোজা পাত্র তিনি নন—

আমি নাবব্ মহাকাব্য

সংরচনে

ছিল মনে,—

ঠেকল কখন তোমার কঁকন-

কিঙ্কিণীতে

কল্লনাটি গেল ফাটি'

হাজার গীতে।

মহাকাব্য সেই অভাব্য

দুর্ঘটনায়

পায়ের কাছে ছড়িয়ে আছে

কণায়-কণায়।

ব্রাস্তবিক কবির দৃষ্টি এখন কত তীক্ষ্ণ, আর কত প্রসারিত তাঁর হৃদয়, তা'র সুন্দর পরিচয় আমরা পাই এর “কবির বয়স” কবিতাটিতে—

কেশে আমার পাক ধরেছে বটে,

তাহার পানে নজর এত কেন ?

পাড়ার যত ছেলে এবং বুড়ো

সবার আমি এক-বয়সী জেনো ।

ওঠে কারো সরল সাদা হাসি,

কারো হাসি আঁখির কোণে-কোণে,
কারো অশ্রু উছলে পড়ে' যায়,

কারো অশ্রু শুকায় মনে-মনে;—

কেউবা থাকে ঘরের কোণে দৌহে,

জগৎ-মাঝে কেউবা হাঁকায় রথ,

কেউবা মরে একলা ঘরের শোকে,

জনারণ্যে কেউবা হারায় পথ ।

সবাই মোরে করেন ডাকাডাকি,

কখন শুনি পরকালের ডাক ?

সবার আমি সমান-বয়সী যে

চুলে আমার যত ধরুক পাক ।

নৈবেদ্য

কল্পনায় ও ক্ষণিকায় কবির ভিতরে যে নবজন্ম-সঞ্চারের
বেদনা উপলব্ধি করেছি, নৈবেদ্যে দেখা যাচ্ছে, সে-বেদনা কেমন
একটু সার্থক হ'য়ে দেখা দিয়েছে স্পর্শতর দৃষ্টিতে । কবি
উপলব্ধি করছেন, সারাজীবন তিনি যে-ভাবে কাটিয়ে এসেছেন,
যে-সব অনুভূতির ভিতর দিয়ে এসেছেন, তা'র কিছুই বৃথা নয়,
মিথ্যা নয় । সেই সমস্তেরই সঙ্গে-সঙ্গে অপক্লপও তাঁর ঘরে বহু
বার প্রবেশ করেছেন—

নির্জন শয়ন-মাঝে কালি রাত্রিবেলা
 ভাবিতেছিলাম আমি বসিয়া একেলা
 গত জীবনের কত কথা । হেন ক্ষণে
 শুনিলাম, তুমি কহিতেছ মোর মনে ;—
 ওরে মত্ত, ওরে মুগ্ধ, ওরে আত্ম-ভোলা,
 রেখেছিলি আপনার সব দ্বার খোলা,
 চঞ্চল এ সংসারের যত ছায়ালোক,
 যত ভুল, যত ধূলি, যত দুঃখ শোক,
 যত ভালো মন্দ, যত গীতগন্ধ ল'য়ে
 বিশ্ব পশেছিল তোর অবাধ আলয়ে ।
 সেই সাথে তোর মুক্ত বাতায়নে আমি
 অজ্ঞাতে অসংখ্যবার এসেছিলাম নাহি ।
 দ্বার রুদ্ধি' জপিতিস্ যদি মোর নাম
 কোন্ পথ দিয়ে তোর চিত্তে পশিতাম ।

নৈবেদ্যের প্রথমে কতকগুলি প্রার্থনা-সঙ্গীত রয়েছে । পূর্ণাঙ্গ
 প্রার্থনার জন্য প্রয়োজন যে স্থির চিত্তের আর স্থির লক্ষ্যের
 রবীন্দ্র-প্রতিভায় এখন সেটি সম্ভবপর হয়েছে । এই প্রার্থনার
 ভিতর দিয়ে এগিয়ে যেতে-যেতে কবি অনুভব করছেন, জাগ্রত
 আত্মার ভার বহন করা কত আয়াসসাধ্য ! অথচ এ ভার
 বহনের প্রতি তাঁর পরম লোভ !—

তোমার পতাকা যারে দাও, তা'রে
 বহিবারে দাও শক্তি ।

তোমার সেবার মহৎ প্রয়াস

সহিবারে দাও ভকতি ।

আমি তাই চাই ভরিয়া পরাণ

হুঃখেরি সাথে হুঃখেরি ত্রাণ,

তোমার হাতের বেদনার দান

এড়ায়ে চাহি না মুকতি !

‘দুখ হবে মোর মাথার মানিক

সাথে যদি দাও ভকতি ।

কিন্তু এ ভার-বোধ শেষে আর থাকছে না । আত্মার অপরূপ
জ্যোতিই তাঁকে চমৎকৃত করছে—

দেহে আর মনে-প্রাণে হ’য়ে একাকার

এ কি অপরূপ লীলা এ অঙ্গে আমার !

এ কি জ্যোতি ! এ কি ব্যোম দীপ্ত দীপ-জ্বালা

দিবা আর রজনীর চির নাট্যশালা !

এ কি শ্যাম বসুন্ধরা সমুদ্রে চঞ্চল,

পৰ্বতে কঠিন, তরুপল্লবে কোমল,

অরণ্যে আঁধার ! এ কি বিচিত্র বিশাল

অবিশ্রাম রচিতেছে সৃজনের জাল

আমার ইন্দ্রিয়-যন্ত্রে ইন্দ্রজালবৎ !

প্রত্যেক প্রাণীর মাঝে প্রকাণ্ড জগৎ ।

তোমারি মিলনশয্যা, হে মোর রাজনু,

ক্ষুদ্র এ আমার মাঝে অনন্ত আসন

অসীম বিচিত্র কাস্ত ! ওগো বিশ্বভূপ,
দেহ মনে প্রাণে আমি এ কি অপরূপ ?

এই নৈবেদ্য কাব্যখানিতে বেশী ক'রে চোখে পড়ে কবির
যোগীর ভাব—পরম মঙ্গলময়ের প্রতি তাঁর চিত্ত সব সময়ে উন্মুখ
হ'য়ে আছে । তাঁর এ যোগ যেন কিছুতেই ভাঙে না—

কালি হাস্যে পরিহাসে গানে আলোচনে
অন্ধরাত্রি কেটে গেল বন্ধুজন-সনে ;
আনন্দের নিদ্রাহারা শান্তি ব'হে ল'য়ে
ফিরি' আসিলাম যবে নিভৃত আলয়ে
দাঁড়াইলু আঁধার অঙ্গনে । শীতবায়
বুলাল স্নেহের হস্ত তপ্ত ক্লাস্ত গায়
মুহুর্তে চঞ্চল রক্তে শান্তি আনি দিয়া ।

মুহুর্তেই মৌন হ'ল স্তব্ধ হ'ল হিয়া
নির্বাকপ্রদীপ রিক্ত নাট্যশালা সম ।
চাহিয়া দেখিলু উর্দ্ধপানে ; চিত্ত মম
মুহুর্তেই পার হ'য়ে অসীম রজনী
দাঁড়াল নক্ষত্রলোকে । হেরিলু তখনি—
খেলিতেছিলাম মোরা অকুণ্ঠিত মনে
তব স্তব প্রাসাদের অনন্ত প্রাঙ্গণে ।

এই পরম সমাহিতচিত্ততার অবস্থায় এমন অনেক কথা
তাঁর কণ্ঠে উচ্চারিত হয়েছে ঋষিদৃষ্ট মন্ত্রের মতনই যা পূর্ণ আর
অগ্নিগর্ভ । নৈবেদ্যের—

‘বৈরাগ্য সাধনে মুক্তি সে আমার নয়’

—এমনই এক বাণী—বিশ্বমানবের কানে (বিশেষ করে’ তাঁর অস্বাভাবিকতা-পীড়িত স্বদেশীয়দের কানে) এক বড় মন্ত্র ।

এই মন্ত্রটি তাঁর সাধনার ধারার মাঝখানে দাঁড়িয়ে তাঁর সমগ্র জীবনকে দু’ভাগ ক’রে দেখাচ্ছে । একদিকে অসংখ্য বন্ধন-মাঝে যে মুক্তির আনন্দ প্রচ্ছন্ন রয়েছে রবীন্দ্রনাথকে বারে-বারে খুঁরে-ফিঁরে নানা পাকে বন্ধ হ’তে দে’খে আর সে-সব বন্ধন এড়িয়ে যেতে দে’খে সে-কথার যোগ্য প্রমাণ আমরা পাই । অন্যদিকে গীতালিতে এই সত্যটি আরো গভীর ক’রে উপলব্ধি করবার পর বলাকা পলাতকা প্রভৃতি কাব্যে দেখতে পাই, দৃষ্টির অব্যর্থতা নিয়ে আনন্দময় কবি যেন স্বর্গ-মর্ত্য পরিভ্রমণ ক’রে বেড়াচ্ছেন ।

ভারত সম্বন্ধে সে-সমস্ত কবিতা এতে আছে, সে-সমস্তও এমনি পূর্ণ আর বীর্য্যবান দৃষ্টির আলোকে ভাস্বর । ভারতের অতীত মহিমা, বর্ত্তমান হীনতা দীনতা, আর ভবিষ্যতের লক্ষ্য, সমস্তই তাঁর যোগ-দৃষ্টিতে তিনি যেন মধ্যদিনের-আলোকে-দেখা চিত্রের মতো পরিষ্কার দেখতে পাচ্ছেন ।—

তাঁহারা দেখিয়াছেন—বিশ্বচরাচর
ঝরিছে আনন্দ হ’তে আনন্দ নির্ঝর ;
অগ্নির প্রত্যেক শিখা ভরে তব কাঁপে,
বায়ুর প্রত্যেক শ্বাস তোমারই প্রতাপে,

তোমারি আদেশ বহি' মৃত্যু দিবারাত
চরাচর মর্ম্মরিয়া করে যাতায়াত ;

* * *
* * *

এ দুর্ভাগ্য দেশ হ'তে হে মঙ্গলময়
দূর ক'রে দাও তুমি সর্ব্ব তুচ্ছ ভয়,
লোকভয়, রাজভয়, মৃত্যুভয় আর ।
দীনপ্রাণ দুর্ব্বলের এ পাষণ-ভার,
এই চির পেষণ-যজ্ঞণা, ধূলিতলে
এই নিত্য অবনতি, দণ্ডে পলে-পলে
এই আত্ম-অবমান, অন্তরে বাহিরে
এই দাসত্বের রজ্জু, তন্তু নতশিরে
সহস্রের পদপ্রান্ততলে বারম্বার
মলুষ্যমর্যাদাগর্ক চিরপরিহার—
এ বৃহৎ লজ্জারাপি চরণ-আঘাতে
চূর্ণ করি' দূর করো !

* * *
* * *

সে পরম পরিপূর্ণ প্রভাতের লাগি'
হে ভারত সর্ব্বদুঃখে রহ তুমি জাগি'
সরলনির্ম্মল চিত্ত ; সকল বন্ধনে
আত্মারে স্বাধীন রাখি' পুষ্প ও চন্দনে
আপনার অন্তরের মাহাত্ম্য-মন্দির
সজ্জিত সুগন্ধি করি' দুঃখনামশির

তাঁর পদতলে নিত্য রাখিয়া নীরবে !
 তাঁ'হতে বঞ্চিত করে তোমায় এ-ভাবে
 এমন কেহই নাই—সেই গর্বভরে
 সর্ব ভয়ে থাকো তুমি নির্ভয় অন্তরে
 তাঁর হস্ত হতে ল'য়ে অক্ষয় সম্মান ।
 ধরায় হোক না তব যত নিম্ন স্থান
 তাঁর পাদপীঠ করো সে আসন তব
 যার পাদরেণুকণা এ নিখিল ভব ।

আরো লক্ষ্যের বিষয় এই যে, কবি এখানে মঙ্গলময়
 ঈশ্বরকে অন্তরে-অন্তরে অনুভব ক'রেই ক্ষান্ত হচ্ছেন না ।
 তাঁকেই তাঁর চিন্তামন্দিরে পূর্ণ গৌরবে প্রতিষ্ঠিত ক'রে তাঁরই
 সৈনিকরূপে সংসার-বন্ধে দৃঢ়পাদক্ষেপে বিচরণ করতে চাচ্ছেন—

ক্ষমা যেথা ক্ষীণ দুর্বলতা,
 হে রুদ্র, নির্ভুর যেন হ'তে পারি তথা
 তোমার আদেশে ! যেন রসনায় মম
 সত্য বাক্য বলি' উঠে খর খড়্গ সম
 তোমার ইঙ্গিতে ! যেন রাখি তব মান
 তোমার বিচারাসনে ল'য়ে নিজ স্থান !
 অশ্রায় যে করে আর অশ্রায় যে সহে
 তব স্বর্ণা যেন তারে তৃণসম দহে ।

বাস্তবিক ক্লেব্যবিবর্জিত এক অসাধারণ বলীয়ান আত্মার
 সাক্ষাৎই আমরা এই নৈবেদ্য কাব্যের প্রায় সব জায়গায় পাই ।

আর এই জগুই রবীন্দ্রনাথের এই কাব্যকে আমরা তাঁর সর্বশ্রেষ্ঠ কাব্যসমূহের অন্যতম বলে' জ্ঞান করি। কাব্যের উৎকর্ষ সৃষ্টিতে; আমরা দেখতে পাচ্ছি, এক ওজস্বল জাগ্রত আত্মা সেই সৃষ্টি-মহিমা লাভ করেছে এই কাব্যে।

নৈবেদ্য কাব্যখানি মুসলমান-পাঠকের কাছে বিশেষভাবে অর্থপূর্ণ; মঙ্গলের অভিমুখে এমন ক্লব্যবিবর্জিত অগ্রগতিই কোর্আনের ইসলামের প্রিয়।

ভাববিলাসী বাঙালীর নিত্যপাঠ্য-হওয়া উচিত এই কাব্য—

যে ভক্তি তোমারে ল'য়ে ধৈর্য নাহি মানে,
মুহুর্তে বিহ্বল হয় নৃত্যগীতগানে
ভাবোন্মাদ মত্ততায়, সেই জ্ঞানহারা
উদ্ভ্রান্ত উচ্ছল-ফেন ভক্তিমদ-ধারা
নাহি চাহি নাথ !

দাও ভক্তি শান্তিরস,
শ্লিষ্ট সুধা পূর্ণ করি' মঙ্গল কলস
সংসার-ভবন-দ্বারে। যে ভক্তি-অমৃত
সমস্ত জীবনে মোর হইবে বিস্তৃত
নিগূঢ় গভীর—সর্ব কর্মে দিবে বল,
ব্যর্থ শুভ চেষ্টারেও করিবে সফল
আনন্দে কল্যাণে। সর্বপ্রেমে দিবে তৃপ্তি,
সর্ব দুঃখে দিবে ক্ষেম, সর্ব সুখে দীপ্তি
দাহহীন।

স্বপ্নিয়া ভাব-অশ্রুণীর

চিত্ত রবে পরিপূর্ণ অমৃত গম্ভীর ।

কিন্তু এর শেষের দিকের দুটি প্রার্থনায় (৮৬, ৮৭) দেখতে পাচ্ছি, আর এক সুর বাজছে কবির চিত্তবীণায়। ধ্যান তাঁর হৃদয়ে চমৎকার উজ্জ্বলতা এনে দিয়েছে; তবু অন্তরের শুষ্কতা তাঁর যুচছে না। সে উজ্জ্বলতা সময়ে যেন তাঁর পক্ষে “নিঃশব্দ দাহ”। তাই কবি প্রার্থনা করছেন—

আমার এ মানসের কানন কাঙাল
শীর্ণ শুষ্ক বাহু মেপি' বহু দীর্ঘকাল
আছে ক্রুদ্ধ উর্জপানে চাহি' ! ওহে নাথ,
এ রুদ্ধ মধ্যাহ্ন মাঝে কবে অকস্মাৎ
পশ্চিক পবন কোন্ দূর হ'তে এসে
ব্যগ্র শাখা প্রশাখায় চক্ষের নিমিষে
কানে-কানে রটাইবে আনন্দমর্মর,
প্রতীক্ষায় পুলকিয়া বন বনাস্তর !

এত ধ্যান-জ্ঞানের অন্তরে অন্তরে এই প্রতীক্ষার ব্যথা !—
তপস্তার রুদ্ধ দহন প্রেমের বর্ষণই চায়।—বিধাতার অসাধারণ
কৃপা এই কবির উপর।

আমাদের মনে হয়, নানা সংস্কার-জর্জরিত হিন্দুধর্মের
বিরুদ্ধে রাজা রামমোহনের যে প্রতিবাদ আর মহর্ষি দেবেন্দ্র-
নাথে প্রতিফলিত বাঙালী-জীবনের যে নব ঈশপ্রাণতা, বাংলা

সাহিত্যে তার এক বড় সার্থকতা লাভ হয়েছে এই নৈবেদ্য কাব্যে ।

নৈবেদ্য প্রকাশিত হয় ১৯০১ সালে । এই ঘটনাও হয়ত নিরর্থক নয়—

শতাব্দীর সূর্য আজি রক্তমেঘ মাঝে
অস্ত গেল,—হিংসার উৎসবে আজি বাজে
অঙ্গে অঙ্গে মরণের উন্মাদ রাগিনী
ভয়ঙ্করী ! দয়াহীনা সভ্যতা নাগিনী
তুলিছে কুটিল ফণা চক্ষের নিমেষে,
শুণু বিষ দস্ত তা'র ভারি তীব্র বিষে ।

আর বিংশ শতাব্দীর এই প্রারম্ভকে সামনে ক'রে ভারতের
এক প্রান্তে এক জাগ্রত-আত্মা কবি প্রার্থনা করছেন—

.....বীৰ্য দেহ, ক্ষুদ্র জনে
না করিতে হীন জ্ঞান,—বলের চরণে
না লুটিতে ; বীৰ্য দেহ, চিত্তেরে একাকী
প্রত্যাহের তুচ্ছতার উর্দ্ধে দিতে রাখি' ।
বীৰ্য দেহ তোমার চরণে পাতি শির
অহর্নিশি আপনারে রাখিবারে স্থির ।

শিশু

নৈবেদ্যের কিছুদিন পরে শিশু-কাব্য প্রকাশিত হয় । এই
শিশুকাব্যের জন্মরাত্তর-সম্বন্ধে অজিত-বাবু বলেন, পীড়িতা কন্যা

মাতৃহীন শিশু-পুত্র সমী কবির কাছে পিতার এবং মাতার উভয়েরই স্নেহ লাভ করত । সেই গভীর স্নেহ থেকে উৎসারিত এই কাব্যটি বাৎসল্য রসে পূর্ণ হ'য়ে উঠেছে ।

শিশুকাব্য রবীন্দ্র-প্রতিভার এক অসাধারণ নিদর্শন সন্দেহ নাই । অজিতবাবু যে বলেছেন, এ সেই বৈষ্ণব মাধুর্য্যতত্ত্ব, ভগবানকে যারা বাৎসল্যরসের ভিতর দিয়ে দেখে তাদের সেই মাধুর্য্যের স্রোতটি এর মধ্যে আগাগোড়া প্রবাহিত, সে-কথাটি অনেক পরিমাণে সত্য । অনেকপরিমাণে বলছি এই শিশু-কাব্যের বিশেষত্বের দিকে দৃষ্টি রেখে । বৈষ্ণব-সম্বন্ধে সাধারণ ধারণা এই যে তিনি ভগবানকে লাভ ক'রে শিশুতে তাঁর প্রকাশের আনন্দ উপলব্ধি করেন ; অথবা গুরুর কাছ থেকে এ তত্ত্বের সন্ধান পেয়ে নিজের জীবনে তা প্রতিফলিত দেখতে প্রয়াস পান । কিন্তু রবীন্দ্রনাথের বেলায় দেখা যাচ্ছে, ভগবৎ-সাধনায়ও নিজের অন্তরের অনুভূতি আর সন্ধানের প্রদীপ তাঁকে পথ দেখাচ্ছে । তাই এ কাব্যে মাধুর্য্য-রসের সঙ্গে-সঙ্গে মিশে' রয়েছে এক রহস্য-রস । কিন্তু তাতে কাব্য-হিসাবে এর গৌরব বেড়েছে বৈ কমেনি ; কেননা আধুনিকের সামনে প্রসারিত যে জগৎক্ষেত্র তা বহুল পরিমাণে বিরাটতর, আর সেই অসীমবৈচিত্র্য-পূর্ণ বিরাট জগৎ-ক্ষেত্রের উপর ক্ষুদ্র শিশু পরম রহস্যপূর্ণ ই বটে ।—

জগৎ-পরাবারের তীরে

ছেলেরা করে মেলা ।

অস্বহীন গগনতল
মাথার পরে অচঞ্চল,
ফেনিল ওই সুনীল জল
নাচিছে সারা বেলা ।
উঠিছে তটে কি কোলাহল—
ছেলেরা করে মেলা ।

এই কাব্যে কবি যেন তাঁর ভগবৎ-উপলব্ধির দ্বারদেশে
দাঁড়িয়ে শিশুতে তাঁর কেমন-এক ছটা প্রত্যক্ষ করছেন—
যেন প্রভাত-সূর্যের কিরণ গাছের পাতা-ফেঁকড়ির ফাঁকে-ফাঁকে
তীক্ষ্ণ হ'য়ে এসে চোখে পড়ছে ।

আগেকার ক্ষণিকার মধ্যে যে সহজ প্রকাশ-ভঙ্গিমা তার
সঙ্গেও এর তফাৎ রয়েছে । ক্ষণিকার মধ্যে যে সহজ প্রকাশের
লীলা সে জীবনানন্দেরই এক বিচিত্র ভঙ্গিমা—ভগবৎ-অন্বেষণ
তার তলে তলে লুকিয়ে রয়েছে ব'লে এই বিচিত্রতা । কিন্তু
'শিশু'র ভিতরে ভগবৎ-দীপ্তি যেন কতকটা সোজাশুজি কবির
চোখে-মুখে এসে পড়তে চাচ্ছে । তাই কবির কথাগুলো খুব
সোজা আর মধুর, কিন্তু তা'রই সঙ্গে-সঙ্গে বাজছে কেমন এক
অপরূপ সন্ধানের সুর—

রঙীন খেলেনা দিলে ও রাঙা হাতে
তখন বুঝি রে, বাছা, কেন যে প্রাতে
এত রং খেলে মেঘে জলে রং ওঠে' জেগে,

কেন এত রং লেগে ফুলের পাতে—
রাঙা খেলা দেখি যবে ও রাঙা হাতে ।

* • * *

যখন নবনী দিই লোলুপ করে,
হাতে মুখে মেখেচুকে বেড়াও ঘরে,
তখন বুঝিতে পারি স্বাদ কেন নদীবারি,
ফল মধুরসে ভারী কিসের তরে,
যখন নবনী দিই লোলুপ করে !

‘সমব্যর্থী’ কবিতায় বালকের সহজ খেলার অন্তরে কবির
মনের কি এক তীক্ষ্ণ জিজ্ঞাসা !—

যদি থোকা না হ’য়ে
আমি হতেম কুকুরছানা—
তবে, পাছে তোমার পাতে
আমি মুখ দিতে চাই ভাতে
তুমি করতে আমায় মানা ?
 সত্যি ক’রে বল
আমায় করিস্ নে মা ছল,
 বলতে আমায় “দূর দূর দূর দূর !”
 কোথা থেকে এল এই কুকুর ?
 যা’ মা তবে যা’ মা,
আমায় কোলের থেকে নামা !
আমি খাবো না তোর হাতে,
আমি খাবো না তোর পাতে !

যদি থোকা না হ'য়ে
আমি হতেম তোমার টিয়ে,
তবে পাছে যাই মা উড়ে
আমায় রাখতে শিকল দিয়ে ?
 সত্যি ক'রে বল
আমায় করিস্ নে মা ছল—
বলতে আমার হতভাগা পাখী
শিকল কেটে দিতে চায়রে ফাঁকি !

এর কতকগুলো কবিতায় বাৎসল্যরস জমাট হ'য়ে দেখা দিয়েছে—

তোমার কটিতটের ধটি
কে দিল রাঙিয়া ?
কোমল গায়ে দিল পরায়ে
রঙীন্ আঙিয়া !
 বিহান বেলা আঙিনা-তলে
এসেছ তুমি কি খেলা-ছলে
চরণ-ছটি চলিতে ছুটি'
পড়িছে ভাঙিয়া ।
তোমার কটিতটের ধটি
কে দিল রাঙিয়া ?

* * *
* * *

বাছারে তোর সবাই ধরে দোষ !
আমি দেখি সকল তা'তে

এদের অসন্তোষ !

খেলতে গিয়ে কাপড়খানা

ছিঁড়ে খুঁড়ে এলে,

তাই কি বলে লক্ষ্মীছাড়া ছেলে ?

ছি ছি কেমন ধারা !

হেঁড়া মেঘে প্রভাত হাসে

সে কি লক্ষ্মীছাড়া ?

আর এর কতকগুলি কবিতা অতি সুন্দর ছড়া—ছোটো-বড়, বীরপুরুষ, বলবান, ইত্যাদি। সমস্ত শিশুকণ্ঠাখানির ভিতরে একটি তাজা, চিরনবীন, রহস্যের সংস্পর্শে চিরচঞ্চল, প্রাণ বলমল করছে !

রবীন্দ্রকাব্যের বৈচিত্র্যের কথা ভাবলে বাস্তবিকই চমৎকৃত হ'তে হয়—চিরদিনই হয়ত সাহিত্যানুরাগীরা এই কথাটি ভেবে চমৎকৃত হবেন।

থেন্ডা

এর কিছুদিন পরে স্বদেশী আন্দোলনের দিনে রবীন্দ্রনাথকে একজন অগ্রণীরূপে দেখতে পাওয়া যায়। নৈবেদ্যে তিনি কর্মক্ষেত্রে যোগ্যভাবে অবতীর্ণ হবার জন্তে প্রার্থনা করেছেন,—

কর মোরে সম্মানিত নব বীর-বেশে,

হরহ কর্তব্য-ভারে, হঃসহ কঠোর

বেদনায় । পরাইয়া দাও অঙ্গে মোর
কতটিল অলঙ্কার । ধন্য করো দাসে
সফল চেষ্টায় আর নিষ্ফল প্রয়াসে ।
ভাবের ললিত ক্রোড়ে না রাখি' নিলীন
কর্মক্ষেত্রে ক'রে দাও সক্ষম স্বাধীন...

স্বদেশী আন্দোলনের দিনে তিনি যে কর্মব্রত নিয়েছিলেন তার উদ্‌যাপনে তাঁর ভিতরে এতটুকু বিধা দেখা যায়নি । সঙ্গীত, বক্তৃতা, আদর্শপ্রচার, ইত্যাদির দ্বারা সে-আন্দোলনকে তিনি আরো বহুগুণে আন্দোলিত ক'রে তুলেছিলেন ।

কিন্তু শেষে দেখা গেল, এ-আন্দোলন থেকে তিনি নিজেকে সরিয়ে নিলেন । এর জন্য তাঁর অনেক ভক্তও তাঁর উপর অসন্তুষ্ট হয়েছেন । রবীন্দ্রনাথের সেই কাজ উচিত হয়েছিল কি অনুচিত হয়েছিল, সে-আলোচনা অনেকটা নিরর্থক । ইতিহাস যে-ভাবে গ'ড়ে উঠছে, সেই-ভাবেই তা'কে গ্রহণ করা ভিন্ন আর উপায় কি আছে । কিন্তু এই যুগের রবীন্দ্রসাহিত্য একটু ভালো ক'রে প'ড়ে দেখলে বুঝতে পারা যায়, যে স্ব-ধর্মের সন্ধান কবি আজীবন ক'রে আসছেন, নিজেকে শেষে স্বদেশী আন্দোলন থেকে বিচ্ছিন্ন ক'রে সেই স্ব-ধর্মপালনই তিনি করেছিলেন । প্রথমতঃ, তিনি যে-আদর্শ থেকে স্বদেশ-মঙ্গলের কথা বলছিলেন, স্বাধীনতা তার শেষ পর্যায়ে তা থেকে ভিন্ন চেহারা নিয়ে দাঁড়িয়েছিল ; দ্বিতীয়তঃ, এক গভীর আধ্যাত্মিক বোধের জন্ম

সমস্ত কর্ম-কোলাহলের মধ্যে তিনি বড় পীড়ন অনুভব করছিলেন। সাধকের যে শাস্ত্র সমাধি, ভক্তের যে সঙ্কোপনের পূজা, এই সমস্তেরই তাঁর বড় প্রয়োজন হ'য়ে উঠেছিল। একেই লক্ষ্য ক'রে কবি বলেছেন *—

বিদায় দেহ ক্ষম আমার ভাই।

কাজের পথে আমি ত আর নাই।

এগিয়ে সব যাও না দলে দলে,

জয়মাল্য লও না তুলি' গলে,

আমি এখন বনচ্ছায়াতলে

অলক্ষিতে পিছিয়ে যেতে চাই,

তোমরা মোরে ডাক দিয়ো না ভাই।

অনেক দূরে এলেম সাথে-সাথে,

চলেছিলাম সবাই হাতে-হাতে,

এইখানেতে ছুটি পথের মোড়ে

হিয়া আমার উঠল কেমন ক'রে

জানিনে কোন্ ফুলের গন্ধ ঘোরে

সৃষ্টিছাড়া ব্যাকুল বেদনাতে।

আর ত চলা হয় না সাথে-সাথে।

ক্ষণিকায় দেখেছি, কবির চিত্তে পরম-সুন্দরের প্রতি অনুরাগ জেগে উঠেছে। নৈবেদ্যে দেখেছি, তিনি যে তাঁরই এ প্রত্যয় কবির ভিতরে দৃঢ় হ'য়ে দেখা দিয়েছে। কিন্তু প্রকৃত

ভক্তভাবে রবীন্দ্রনাথকে প্রথম দেখি খেয়াতে। অনুরাগ আর বিশ্বাসেই তিনি সম্মুখ থাকতে পারছেন না—“প্রতীক্ষা” তাঁর ভিতরে নিবিড় হ’য়ে উঠেছে। সেই প্রতীক্ষার ব্যথায় কবি এক নূতন ভঙ্গিতে কথা বলছেন।—

আমার যে এই নূতন গড়া
নূতন-বাঁধা তার
নূতন সুরে করতে সে যায়
সৃষ্টি আপনার।
মেশে না তাই চারিদিকের
সহজ সমীরণে,
মেলে না তাই আকাশ-ডোবা
স্তব্ধ আলোর সনে।
জীবন আমার কাঁদে যে তাই
দৃশ্যে পলে পলে,
যত চেষ্টা করি কেবল
চেষ্টা বেড়ে চলে।
ঘটিয়ে তুলি কত কি যে
বুঝি না এক তিল,
তোমার সঙ্গে অনায়াসে
হয় না সুরের মিল।

বেশীর ভাগ কথা কবি রূপক দিয়ে বলছেন। এর এক কবিতায় বালিকা-বধূর এক সুন্দর ছবি আঁকা হয়েছে। কিন্তু

সেটি হয়ত শুধু বালিকা-বধূর ছবিই নয়। কবি অনুভব
করছেন, সেই ক্রিয়াটের পাশে তাঁর নিজের চিত্তও এমনি বালিকা
বধূর মতমই দাঁড়িয়ে। তিনি যে কত বড়, কি যে তাঁর মহিমা,
অবোধ বালিকারই মতন কবি-হৃদয় সেই তত্ত্বের রস-বিলাসের
সন্ধান পুরোপুরি পায়নি ; তবু তাঁর সঙ্গে কবির যে কেমন-একটি
নিবিড় যোগ-স্থাপিত হয়েছে এ-কথাটি বাঁশির সুরের
অনির্বচনীয়তা নিয়েই বেজে উঠেছে !—

ওগো বর, ও গো বঁধু,
এই যে নবীনা বুদ্ধিবিহীনা
এ তব বালিকা বধু।
তোমায় উদার প্রাসাদে একেলা
কত খেলা নিয়ে কাটায় যে বেলা,
তুমি কাছে এলে ভাবে তুমি তা'র
খেলিবার ধন শুধু ;
ওগো বর ওগো বঁধু।

* * * *

শুধু ছদ্মিানে ঝড়ে
—দশ দিক আসে আঁধারিয়া আসে
ধরাতলে অস্বরে—

তখন নয়নে ঘুম নাই আর,
খেলাধুলা কোথা প'ড়ে থাকে তা'র
তোমারে সবলে রহে আঁকড়িয়া,

হিয়া কাঁপে ধরথরে—

চুখ-দিনের ঝড়ে ।

যে প্রতীক্ষা নিয়ে কবি জেগে আছেন তাঁ'র চমৎকার রূপটি
ফুটে রয়েছে এর আগরণ কবিতায়—

কৃষ্ণ পক্ষে আধখানা চাঁদ

উঠল অনেক রাতে,

খানিক কালো খানিক আলো

পড়ল আঙিনাতে ।

ওরে আমার নয়ন আমার

নয়ন নিদ্রাহারা,

আকাশ-পানে চেয়ে-চেয়ে

কত গুন্বি তারা ?

সাদা কারো নাইরে সবাই

ঘুমায় অকাতরে ।

প্রদীপগুলি নিবে গেল

ছয়ার-দেওয়া ঘরে ।

তুই কেন আজ বেড়াস্ ফিরি'

আলোয় অন্ধকারে ?

তুই কেন আজ দেখিস্ চেয়ে

বনপথের পারে ?

বৈষ্ণব কবির রাধার প্রতীক্ষার চাইতে একহিসাবে নিবিড়তর
এই খেয়ার প্রতীক্ষা । বৈষ্ণব কবির অনুভূতি নিশ্চয়ই অতি
গভীর, কিন্তু জীবনের জটিলতা তাঁর সামনে কম ; কেমন সহজ

প্রতীক্ষার ভিতর দিয়ে তিনি কেমন সহজ অথচ গভীর মিলনে পৌঁছুতে পারছেন। কিন্তু রবীন্দ্রনাথের—আধুনিকেরও বটে—প্রতীক্ষা বড় আশ্চর্য্য। দেবতার যৌবন নিয়ে একসময়ে যিনি উর্বরশীর নৃত্য উপভোগ করেছেন, বিজয়িনীর বিজয় চেয়ে দেখেছেন ; গভীর জ্ঞানকে আত্মসাৎ ক’রে গভীর উদাত্ত কণ্ঠে যিনি ঘোষণা করেছেন—

“বৈরাগ্য সাধনে মুক্তি সে আমার নয়,”

অথবা—

যেথা তুচ্ছ আচারের মরুবালিরাশি
বিচারের শ্রোতঃপথ ফেলে নাই গ্রাসি’,
পৌরুষেরে করেনি শতধা ; নিত্য যেথ
তুমি সর্ব কৰ্ম চিন্তা আনন্দের নেতা,—
নিজ হস্তে নির্দয় আঘাত করি’ পিতঃ
ভারতেরে সেই স্বর্গে করো জাগরিত....

সেই বলীয়ান-হৃদয় কবি আজ বিরাটের প্রেমের আকর্ষণে নব-অনুরাগিণী কিশোরীর মতন কাঁপছেন ! ভাষার যত দীপ্তি, উচ্ছ্বাস, কল্পনার যত উদ্দামতা, সে-সব আজ কোথায় ? একেবারে শাদা কথায় হৃদয়টি অনাবৃত করবার জন্য কবি ব্যাকুল ! *

* সর্কশ্ মশো কেটু শাম আজ্ গায়রাতং বসুজদ্ ।

দিলবর্ কে দর্ কফে উ মোমাস্ত সংগে থার। ॥

হাকৈজ ॥

উন্নত-শির হয়ো না, হলে মোমবাতির মতো জলবে ।

চিন্তহারী এমন যে তার হাতে পড়ে’ শিলা মোম হয় ।

গীতাঞ্জলি

গীতাঞ্জলিতে দেখা যাচ্ছে, খেয়ার এই প্রতীক্ষা কান্নায় ফেটে
পড়তে চাচ্ছে—

কোথায় আলো কোথায় ওরে আলো !

বিরহানলে আলোরে তারে আলো ।

রয়েছে দীপ না আছে শিখা

এই কি ভালে ছিল রে লিখা,

ইহার চেয়ে মরণ সে যে ভালো ।

বিরহানলে প্রদীপখানি আলো ।

গীতাঞ্জলির প্রায় সব জায়গায়ই দেখতে পাওয়া যায়, কবি
বিরহের ব্যথা বড় গভীর ক'রে অনুভব করছেন। সেই
বিরহের ভিতরেই কখনো-কখনো প্রিয়তমের কেমন-একটুখানি
সান্নিধ্যও লাভ করতে পারছেন ।

বাহিত-সম্বন্ধে নানা কথাই কবির মনে জাগছে, বড়
মাধুর্য্য-মাখা সেই সব কথা । কখনো বলছেন—

অমন আড়াল দিয়ে লুকিয়ে গেলে

চলবে না ।

এবার হৃদয়-মাঝে লুকিয়ে বোসো

কেউ জানবে না কেউ বলবে না । (২৪)

তিনি জানেন, তাঁর হৃদয় এখনো তাঁর চরণস্পর্শে ধন্য হবার
মতো হয়নি,—

জানি আমার কঠিন হৃদয়
চরণ রাখার যোগ্য সে নয়,
কিন্তু এ কথা বলবার অধিকার কবি পেয়েছেন—
সখা তোমার হাওয়া লাগলে হিরায়
তবু কি প্রাণ গলবে না?
আর এ যে-সে অধিকার নয়।

মাঝে-মাঝে কবি অদ্ভুত আব্দারে কথা বলছেন—

মুখ ফিরিয়ে রবো তোমার পানে
এই ইচ্ছাটি সফল করো প্রাণে। (৯৯)

কখনো অজানিতভাবে তাঁর ক্ষণিক স্পর্শ লাভ করে সচেতন
হ'য়ে কবি নিজেকে ধিক্কার দিচ্ছেন—

সে যে পাশে এসে বসেছিল
তবু জাগিনি! (৬২)

ধরা যেতে পারে বিরহের বেদনাই গীতাঞ্জলির মূল সুর,
আর রীতিমত তীব্র সে বেদনা।

কবি প্রায় সব অবস্থায়ই এই বিরহের বেদনা অনুভব করছেন।
প্রভাতে জেগে উঠে বলছেন,—

সুন্দর তুমি এসেছিলে আজ প্রাতে
অরুণ বরণ পারিজাত ল'য়ে হাতে। (৬৮)

মেঘলা দিনে বলছেন,—

মেঘের পরে মেঘ জমেছে,
 আঁধার করে আসে,
 আমায় কেন বসিয়ে রাখো
 একা হারের পাশে । (১৭)

বৃষ্টির মাতামাতি দেখে তিনি বলছেন—

ওরে বৃষ্টিতে মোর ছুটেছে মন,
 লুটেছে ঐ ঝড়ে,
 বুক ছাপিয়ে তরঙ্গ মোর
 কাহার পায়ে পড়ে । (২৮)

স্নান বৈকালে তাঁর মনে পড়ছে—

এখন বিজন পথে করে না কেউ
 আসা যাওয়া
 ওরে প্রেম-নদীতে উঠেছে ঢেউ
 উতল হাওয়া ।
 জানি না আর ফিরব কিনা
 কার সাথে আজ হবে চিনা,
 ঘাটে সেই অজানা বাজায় বীণা তরলীতে । (৩৭)

ঝড়ের রাতে তিনি আকুল হয়ে ভাবছেন—

আজি ঝড়ের রাতে তোমার অভিসার,
 পরাগসখা বন্ধু হে আমার । (২১)

আর সব অবস্থাতেই তাঁর মনে জাগছে—

প্রভু তোমা লাগি আঁখি জাগে ;

দেখা নাই পাই

পথ চাই,

সেও মনে ভালো লাগে । (২৯)

গীতাঞ্জলিতে কবির দুই ভাবের সাধনা আমরা লক্ষ্য করি ।
একবার তিনি বলছেন—

নিভৃত প্রাণের দেবতা

যেখানে জাগেন একা,

ভক্ত সেথায় খোলো দ্বার,

আজ লবো তাঁর দেখা । (৫১)

আর-বার বলছেন—

ভজনপূজন সাধন আরাধনা

সমস্ত থাক পড়ে ।

রুদ্ধদ্বারে দেবালয়ের কোণে

কেন আছি স্ ওরে ? (১২০)

অথবা—

বিশ্ব সাথে যোগে যেথায় বিহারো

সেইখানে যোগ তোমার সাথে আমারো ।

নয়ক বনে নয় বিজনে,

নয়ক আমার আপন মনে,

সবার যেথায় আপন তুমি, হে প্রিয়,
সেথায় আপন আমারো । (৯৫)

এর ভিন্ন-ভিন্ন পরিণতি আমরা গীতিমাল্যে, আর গীতালি-
বলাকা-পলাতকায় দেখতে পাই ।

গীতাঞ্জলির এই বিরহ বৈষ্ণব বা সুফীর বিরহের সঙ্গে
মিলিয়ে পড়া যেতে পারে । প্রকৃত বৈষ্ণব চমৎকার প্রেমিক,
তাই প্রেমের ব্যথা রবীন্দ্রনাথ যখন অনুভব করেছেন তখন
বৈষ্ণবের ভাবটি মাঝে-মাঝে তাঁর ভিতরে যে ফুটে উঠবে এটি
স্বাভাবিক । রাধিকার ভাবটি গীতাঞ্জলির অনেক জায়গায়ই
বেশ ফুটে উঠেছে । এমন-কি কেউ যদি বলেন, বৈষ্ণবের
প্রেমের ভাবটিই গীতাঞ্জলিতে বেশী প্রস্ফুট, তা হলে তাঁর সঙ্গে
তর্ক না করলেও চলে । তবু একথা বলতেই হবে, মোটের
উপর বৈষ্ণবের প্রেমের ধাত রবীন্দ্রনাথের নয় । বৈষ্ণব মূর্তি-
বাদী, রাধাকৃষ্ণ এক সুন্দর রসঘন বিগ্রহ ব'লেই বৈষ্ণব তা
অবলম্বন করে আনন্দ পান । কিন্তু রবীন্দ্রনাথ রহস্যময়ের পূজারি ।
সে রহস্যময় তাঁর কাছে “জলে স্থলে” “নানা আকারে” ধরা
দেন । কবি নিজের গাঢ় অনুভূতিতে কখনো তাঁর চরণ ছুঁতে
পারছেন । কখনো মৃত্যুর বেশে তিনি কবির মনোনেত্রে
আবির্ভূত হচ্ছেন ।

এই জন্মই সুফীর আধ্যাত্মিক সাধনার সঙ্গেও তাঁর কিছু
অমিল রয়েছে ; সুফীও পীর মানেন, শাস্ত্রের সত্যকে জীবনে

উপলব্ধি করতে চেষ্টা করেন। বাস্তবিক রবীন্দ্রনাথের সাধনায় নূতনত্বই বেশী করে চোখে পড়ে।

ইয়োরোপ তাঁকে বলেছে ‘মিস্টিক’ (Mystic)। কিন্তু মিস্টিক বললে তাঁর বিশেষত্ব-নির্দেশ পূরোপুরি হয় না, কেননা এ-কথাটি খুবই ব্যাপক। ওয়ার্ডসওয়ার্থও (Wordsworth) Mystic, ‘এমার্সন’ও (Emerson) Mystic আবার ব্লেকও (Blake) Mystic. শ্রীযুক্ত নলিনীকান্ত গুপ্ত Mystic-এর এক সংজ্ঞা দিয়েছেন—“তার কাছে মধ্যাহ্নের তপন বড় রুঢ় রুঢ়, সে ভালোবাসে ছায়া-আলোর মিশ্রণ।” এক শ্রেণীর Mystic সম্বন্ধে একথা প্রযোজ্য বটে, কিন্তু রবীন্দ্রনাথ সম্বন্ধে এ-কথাটি খাটে না। তাঁর সন্ধানের তীব্রতা অনুভূতির গাঢ়তা আর প্রকাশের পর্যাপ্তি প্রায় সব জায়গায় চোখে পড়ে।

রবীন্দ্রনাথ Mystic এই হিসাবে যে সত্যের চিররহস্যময় দ্বারে তিনি উঁকি মেরেছেন। সেই হিসাবে হয়ত শক্তিমান-মাত্রেরই জীবনের অন্তস্থলে দেখতে পাওয়া যায় Mysticism.

বৈষ্ণবের ‘সহজ ভক্তি’র সুর রবীন্দ্রনাথে পান না বলে অনেক-কে দুঃখ করতে দেখেছি। তাঁরা ভুলে যান, মানুষের জীবন বিচিত্র, জীবনের সার্থকতাও বিচিত্র। তা ছাড়া, অপরের পরিচয় যখন আমরা পেতে যাই তখন আমাদের উচিত, নিজেদের খেয়াল রুচি ইত্যাদি একটুখানি চেপে রাখা। এই জ্ঞানী মানী সুসভ্য কবি যখন বলছেন—

জড়িয়ে গেছে সর-মোটা

ছটো তারে

জীবনবীণা ঠিক সুরে তাই

বাজেনারে (১২৯)

তখন, কি দুঃখে তাঁর হৃদয়ে এই দারুণ অস্বস্তি বাজছে, কি সত্য রয়েছে এর ভিতরে,—সেই সমস্তের অনুসরণই কি সত্য-অনুসরণ নয় ? ঝাঁরা “সহজ অধিকারে” ডুব দিয়ে অতলে তলিয়ে যেতে পেরেছেন তাঁরা নিশ্চয়ই ভাগ্যবান । (অবশ্য “সহজ অধিকার” বলে’ কোনো কিছু আদৌ আছে কিনা তাও বিচারের বিষয় ।) কিন্তু যিনি তেমনি ক’রে নিজেকে তলিয়ে দিতে পারছেন না, অথচ অতলের জন্য প্রাণ তাঁর আকুল হয়ে উঠেছে, তাঁর সেই আকুলতায়ও ত বিশ্ববিধাতার এক চমৎকার লীলা । মানুষের পক্ষে তা একতিলও অসত্য নয় । তার উপর খেয়া গীতাঞ্জলি গীতামাল্য শুধু বিরহীর কান্নাই নয়, এসমস্ত ফুটে উঠেছে এক নব বিরহ-মূর্তি । এই সমস্ত কাব্যের অনেক কবিতা যে ইয়োরোপের আধুনিক ভাবুক মনীষীদের হৃদয় স্পর্শ করেছে সেও এই জন্যেই ।*

গীতিমাল্য

গীতাঞ্জলির যে কান্না, গীতিমাল্যে তা থেমে যায়নি । কিন্তু সে অশ্রুর এখন এক নতুন বেশ । এ তীব্র বেদনার অশ্রু নয়,

* গীতিমাল্যের “কেন চোখের জলে ভিজিয়ে দিলেম না” শীর্ষক কবিতার আলোচনা দ্রষ্টব্য ।

এ অশ্রুর ভিতর দিয়ে কবি-হৃদয়ের কেমন-এক স্নিগ্ধ শান্তি
চোখে পড়ে,—যেন বৃষ্টিতে-ভেজা টগর। গীতাঞ্জলিতে ঝড়ের
রাত্রে কবি বলেছেন—

আজি ঝড়ের রাতে তোমার অভিসার
পরানসখা বন্ধু হে আমার...,

আর গীতিমাল্যে বলেছেন—

যে রাতে মোর দুয়ারগুলি
ভাঙল ঝড়ে
জানি নাই ত তুমি এলে
আমার ঘরে ।
সব যে হয়ে গেল কালো
নিবে গেল দীপের আলো
আকাশ পানে হাত বাড়ালেম
কাহার তরে ॥
অন্ধকারে রইলু প'ড়ে
স্বপন মানি ।
ঝড় যে তোমার জয়ধ্বজা
তাই কি জানি ?
সকাল বেলায় চেয়ে দেখি
দাঁড়িয়ে আছ তুমি একি,
ঘরভরা মোর শূন্যতারি
বুকের পরে ॥ (৬৭)

কবির অন্তরের ব্যথা ঘুচে যায়নি, কিন্তু অন্তরের তলে কেমন-
একটু তৃপ্তি গীতিমাল্যের অনেকগুলি কবিতাকে সরস ক'রে
রেখেছে—

আমার এই পথ চাওয়াতেই আনন্দ । (৭)

কোলাহল ত বারণ হ'ল

এবার কথা কানে-কানে । (৮)

কে গো অন্তরতর সে ?

আমার চেতনা আমার বেদনা

তারি স্নগভীর পরশে । (২২)

ভোরের বেলায় কখন এসে

পরশ করে গেছ হেসে । (৩৫)

ইত্যাদি ।

ভক্তের যে সঙ্গোপনের পূজা সেইটিই গীতিমাল্যের মূল সুর ।
কবির যত কথা যত দুঃখ যত সার্থকতা যত আনন্দ একান্ত ক'রে
তাকেই তিনি বলছেন—

লুকিয়ে আসো অঁধার রাতে

তুমি আমার বন্ধু ।

লও যে টেনে কঠিন হাতে

তুমি আমার আনন্দ ॥ (৪৭)

গীতিমাল্যে কবি বড় খাদের পর্দায় সুর বেঁধেছেন ; তাই তা পুরোপুরি উপভোগ করবার জন্য খুব দরদীর কান চাই। সেই কান থাকলে গীতিমাল্যে খুবই একটা গভীর তৃপ্তি অনুভব করা যায়। এই খাদের পর্দাতে সময়-সময় কবির মনের কথা কি মর্মস্পর্শী হয়ে বেজে উঠেছে !—

“এই যে তুমি” এই কথাটি
বল্‌ব আমি ব’লে
কত দিকেই চোখ ফেরালেম
কত পথেই চ’লে ।
ভরিয়ে জগৎ লক্ষ ধারায়
“আছ আছ”র স্রোত ব’হে যায়
“কই তুমি কই” এই কঁাদনের
নয়ন-জলে গলে ॥ (১৪)

* * * * *
যদি জানুতেম আমার কিসের ব্যথা

তোমায় জানাতাম ।

কে যে আমায় কঁাদায়, আমি
কি জানি তার নাম ।

... ..

এই বেদনার ধন সে কোথায়

ভাবি জনম ধ’রে ।

ভুবন ভ’রে আছে যেন

পাইনে জীবন ভ’রে ।

সুখ যারে কয় সকল জনে
বাজাই তা'রে ক্ষণে-ক্ষণে,
গভীর সুরে “চাইনে, চাইনে,”
বাজে অবিশ্রাম ॥ (৫৭)

তখন মনে হয় এমন খাদের পর্দায় সুর না ধরলে এমন
অপূর্ব গান শুন্বার সৌভাগ্য আমাদের হ'ত না ।

রবীন্দ্রনাথের আধ্যাত্মিক সাধনার চেহারা গীতিমালায়
অনেকখানি পরিস্ফুট হ'য়ে উঠেছে । কোনো গুরু বা শাস্ত্র
তঁার পথ-প্রদর্শক নন । উপনিষৎ তঁার প্রিয়, বৈষ্ণব কবিতার
সঙ্গে তঁার ঘনিষ্ঠ পরিচয়, দেশবিদেশের সাহিত্যমহারথীদের
প্রতি তঁার প্রচুর শ্রদ্ধা, তঁার পিতার জীবনব্যাপী আধ্যাত্মিক
বেদনা তঁার অনুপ্রাণনার এক বড় উৎস ; কিন্তু প্রকৃত গুরুর
পদে বরণ তিনি কাউকেই করেন নাই । তঁার অন্তরের অনুভূতিই
বিশ্ব-গতের বুকের উপর দিয়ে তঁার পথ দেখিয়ে চলেছে—

মিথ্যা আমি কি সন্ধান
যাবো কাহার দ্বার ?
পথ আমারে পথ দেখাবে
এই জেনেছি সার ।
গুধাতে যাই যারি কাছে
কথার কি তার অন্ত আছে ?

যতই গুনি চক্ষে ততই

লাগায় অন্ধকার । (৬২)

নিজের অন্তরের সত্যকার বেদনা যে কেমন ক'রে
মানুষকে পথ দেখায়—চিরকাল মানুষকে পথ দেখিয়ে এসেছে—
সে কথাটি অমূল্য এক কবিতায় বড় সুন্দর ক'রে বলা হয়েছে ।
মনে হয়, সমস্ত রবীন্দ্র-কাব্যে এ একটি শ্রেষ্ঠ কবিতা—

আমার ব্যথা যখন আনে আমায়

তোমার দ্বারে

তখন আপনি এসে দ্বার খুলে দাও

ডাকো তারে ।

* * *

আমার ব্যথা যখন বাজায় আমায়

বাজি সুরে,

সেই গানের টানে পারো না আর

রইতে দূরে ।

লুটিয়ে পড়ে সে-গান মম

ঝড়ের রাতের পাখী-সম,

বাহির হয়ে এস তুমি

অন্ধকারে ;

আপনি এসে দ্বার খুলে দাও

ডাকো তারে । * (৬৪)

* কবীরও বলেছেন—

বাসুরি জব মোহে ডগরা ধরাঙ্গি ।

রয়না আনুহেরী রহি কারী বাদয়ন-সে

এর “ঝড়ে যায় উড়ে যায় গো” শীর্ষক কবিতাটি বড় অদ্ভুত—

ঝড়ে যায় উড়ে যায় গো
আমার মুখের আঁচলখানি।
ঢাকা থাকে না হয় গো
তা’রে রাখতে নারি টানি। (১৯)

কোন চুম্বকের আকর্ষণে কবি-চিত্ত এমন অস্থির হ’য়ে
উঠেছে আমাদের পক্ষে তা বোঝা সহজ নয়। হাফেজও
এক জায়গায় বলেছেন—

দিল্ মিরওদ জে দস্তম্
সাহিবদিল্! খোদারা। *

ডগরা মোহে কোন দিখাই ॥
ঠারী কোই দেখত আপন অঙন-সে
জিন্হে কভি বাহুরি বুলাই।
ডগরা মোহে কোন দিখাই ॥
ডর নাহি কুচ্ছেঁ ডগরা না পুচ্ছেঁ
বাহুরি হনত কবীর বড় জাই।
পীতম বুলাওত আনহেরী-কি পার-সে
কোন বেশরম আজ তোর সাথ জাই ॥

বাহুরি—বীশি ; জব—যখন ; মোহে—আমাকে ; ডগরা—পথ ; ধরাই—ধরিয়ে-
ছিল ; রয়না—রাত্রি ; আনহেরী—অন্ধকার ; কারী বাদরন-সে—কালো বাদলের দ্বারা ;
ঠারী—দাঁড়িয়ে দাঁড়িয়ে ; কোই—কোনো কোনো পূর্ব সাধক ; হনত—গুণ্ডে
গুণ্ডে ; বড় জাই—এগিয়ে যাও ; পীতম—প্রিয়তম ।

শ্রীযুক্ত ক্ষিতিমোহন সেন মহাশয়ের অপ্রকাশিত সংগ্রহ থেকে গৃহীত ।

* হাত হতে মোর হৃদয় যায় দোহাই বাঁচাও হৃদয়বান্!—কবি নজরুল ইসলামের
অনুবাদ ।

সহজের সাধনায় কবি যে অনেকখানি এগিয়েছেন
গীতিমাল্যের অনেকগুলি কবিতায় তার পরিচয় রয়েছে—

বাজাও আমারে বাজাও ।

বাজালে যে সুরে প্রভাত আলোরে

সেই সুরে মোরে বাজাও ।

যে সুর ভরিলে ভাষা-ভোলা গীতে

শিশুর নবীন জীবন-বাঁশিতে

জননীর মুখ তাকানো হাসিতে

সেই সুরে মোরে বাজাও । (৩৯)

আকাশে ছুই হাতে প্রেম বিলায় ও কে ?

সে-সুধা গড়িয়ে গেল লোকে-লোকে ।

গাছেরা ভরে নিল সবুজ পাতায়,

ধরণী ধ'রে নিল আপন মাথায় ।

ফুলেরা সকল গায়ে নিল মেখে ।

পাখীরা পাখায় তারে নিল এঁকে । (১০৮)

*

*

*

গীতিমাল্যের শেষের দিকে কতকগুলি কবিতায় দেখা
যাচ্ছে, কবির বেদনা প্রায় অন্তর্হিত হয়েছে, আর আনন্দ বেশ
সজীব হয়ে উঠেছে—

শ্রাবণের ধারার মত পড়ুক ঝরে পড়ুক ঝরে,

তোমারি সুরটি আমার মুখের পরে বুকের পরে ।

পূরবের আলোর সাথে পড়ুক প্রাতে দুই নয়নে
 নিশীথের অন্ধকারে গভীর ধারে পড়ুক প্রাণে ।
 নিশিদিন এই জীবনের সুখের পরে দুখের পরে
 শ্রাবণের ধারার মত পড়ুক ঝরে পড়ুক ঝরে ॥ (৬৮)

* * * *

তুমি যে সুরের আগুন লাগিয়ে দিলে মোর প্রাণে
 সে আগুন ছড়িয়ে গেল
 সবখানে ।

যতসব মরা গাছের ডালে ডালে
 নাচে আগুন তালে তালে
 আকাশে হাত তোলে সে
 কার পানে ॥ (৬৯)

বৈষ্ণবের সেই

এ ঘোর রজনী মেঘের ঘটা
 কেমনে আইলা বাটে
 আগ্নিনার পরে তিতিছে বঁধুয়া
 দেখে যে পরাণ ফাটে—

কবিতার সঙ্গে গীতিমাল্যের “কেন চোখের জলে ভিজিয়ে
 দিলেম না” শীর্ষক কবিতাটি মিলিয়ে পড়া যেতে পারে ।
 বৈষ্ণবের সরল হৃদয়, বাইরের বন্ধনই তাঁকে আকুল করেছে ।
 তিনি কোঁদে বকু ভাসিয়ে দিয়েছেন । কবে সর্বস্বার্থপর এই

তা কে না বুঝতে পারে ?—কিন্তু গীতিমাল্যের কবির দুঃখ দেখছি একটু ভিন্ন রকমের ;

তুমি পার হ'য়ে এসেছ মরু
নাই যে সেথায় ছায়াতরু,
পথের দুঃখ দিলেম তোমায়,

এমন ভাগ্যহত ! (৯১)

বাইরের তেমন-কোনো প্রতিবন্ধকতা তাঁকে দুঃখ দিচ্ছে না । তাঁর প্রিয়তমের আস্‌বার পথ রুদ্ধ হয়েছে তাঁর নিজের অন্তরের শুষ্কতার মরুতে—শিথিলপ্রযত্নতার মরুতে । আধুনিক কবির এই দুঃখ বিশেষ করে' আধুনিক জগতের লোকেরই দুঃখ, কেননা মানুষের এই ভিতরকার বন্ধনই আজ বেশী প্রবল হয়ে দেখা দিয়েছে । *

এক যুগের কাব্যের ভিতরকার কথার সঙ্গে অন্য যুগের কাব্যের ভিতরকার কথার নিশ্চয়ই খুব বেশী মিল । তবু এক যুগের ভাবের অবলম্বন আর প্রকাশভঙ্গিমা অন্যযুগের ভাবের অবলম্বন আর প্রকাশভঙ্গিমা হ'তে বিভিন্ন হতে বাধ্য, নইলে ভিন্ন ভিন্ন যুগ বলে' কোনো কথাই থাকত না । অতীতের যাঁরা অন্ধ ভক্ত এ কথাটি তাঁদের স্মরণ রাখা দরকার ।

গীতিমাল্যের শেষের কবিতায় কবি যে প্রণাম নিবেদন করেছেন কেমন-এক সার্থকতার আনন্দ রয়েছে তাতে—

*অন্ততঃ, বন্ধন যে চিরদিনই ভিতরকার, আধুনিক কবির ভাষায় সেটি বেশী পরিস্ফুট হয়ে উঠেছে ।

মোর সন্ধ্যায় তুমি স্নানুর বেশে এসেছ
তোমায় করি গো নমস্কার ।
মোর অন্ধকারের অন্তরে তুমি হেসেছ,
তোমায় করি গো নমস্কার । (১১১)

গীতালি

কবির এত দিনের সব কান্না ব্যথা কেমন এক সার্থকতার
শ্রীতে মণ্ডিত হ'য়ে দেখা দিয়েছে গীতালিতে—

ছঃধের বরষায়
চক্ষের জল যেই
নামূল
বক্ষের দরজায়
বন্ধুর রথ সেই
ধামূল ।

* * *
এত দিনে জান্লেম
যে কাদন কাদ্লেম
সে কাহার জন্ত ।
ধন্ত এ ক্রন্দন,
ধন্ত এ জাগরণ,
ধন্ত রে ধন্ত । (১)

গীতালির প্রায় সব কবিতায়ই এই সুর—এই সার্থকতার
স্বস্তির সুর ।

ভক্ত কবি তাঁর চিরবাহিতের সামনে বসে যে সব আব্দারের
কথা বলছেন কত নিবিড় তা'র রসটি !—

বন্ধ আমার এমন করে'
বিদার্ত যে করো
উৎস যদি না বাহিরায়
হবে কেমনতরো ? (৩২)

অথবা

গর্ব আমার নাই রহিল প্রভু,
চোখের জল ত কাড়বে না কেউ কভু। (৬৪)

তাঁর হৃদয়-গৃহে-শয়ান প্রিয়তমকে জাগবার জন্য কবি যে
ডাকছেন কোনো ব্যথা কোনো আশঙ্কা নেই সেই স্বরে। পূর্ণ
বিশ্বাসে প্রাণ ভরে' তিনি বলছেন—

মোর হৃদয়ের গোপন বিজন ঘরে
একেলা রয়েছ নীরব শয়ন-পরে—
প্রিয়তম হে জাগো জাগো জাগো।
রুদ্ধ দ্বারের বাহিরে দাঁড়ায়ে আমি
আর কত কাল এমনে কাটিবে স্বামী—
প্রিয়তম হে জাগো জাগো জাগো।

... ..

মিলাবো নয়ন তব নয়নের সাথে
মিলাবো এ-হাত তব দক্ষিণ হাত—

প্রিয়তম হে জাগো জাগো জাগো ।

হৃদয়পাত্র সুধায় পূর্ণ হবে,
 তিমির কাঁপবে গভীর আলোর রবে
 প্রিয়তম হে জাগো জাগো জাগো । -

এখন সার্থকতার অঞ্জে কবির দৃষ্টি আরো পরিষ্কার ; আর
 প্রেমামৃত পানে তাঁর কণ্ঠ আরো সবল । তাই তাঁর এতদিনের
 আধ্যাত্মিক সাধনার যে বেদনা আর এখনকার যে আশা
 সে-সম্বন্ধে কবি বেশ দারাজ বাক্ষারে কথা বলছেন—

যখন তুমি বাঁধছিলে তার
 সে যে বিষম ব্যথা ।
 আজ বাজাও বীণা, ভুলাও ভুলাও
 সকল দুখের কথা । (১৭)

গীতালিতে কতকগুলো উঁচুদের কবিতা স্থান পেয়েছে—
 রূপ আর রসের দিক দিয়েই উঁচুদের—

আগুনের
 পরশমণি
 ছোঁয়াও প্রাণে
 এজীবন
 পুণ্য করো
 —দহন দানে (১৮)

যে থাকে থাক না ঘরে
 যে যারি মা না পারে ।

... ..

কুঁড়ি চায় আঁধার রাতে
শিশিরের রসে মাতে ।

ফোটাফুল চায় না নিশা
প্রাণে তার আলোর তৃষা

—কাদে সে অন্ধকারে । (২৩)

অগ্নিবীণা বাজাও তুমি
কেমন ক'রে ?—

আকাশ কাঁপে তারার আলোর
গানের ঘোরে । (৫৩)

পুষ্পদিয়ে মারো যারে
চিন্লে না সে মরণকে ।

বাণ খেয়ে যে পড়ে, সে যে
ধরে তোমার চরণকে । (৭৩)

ইত্যাদি ।

এর দুটি কবিতা গীতিমাল্যের সেই “ঝড়ে যায় উড়ে যায় গো”
শীর্ষক কবিতার মতনই আমাদের মতো সাধারণ পাঠকের
কাছে দুজ্জের্য । গুহ (Esoteric) সাধনা যাঁরা করেন তাঁরা
হয়ত এ সমস্তের রস ভালো ক’রে উপভোগ করতে পারেন—

কোন্ সাহসে একেবারে
শিকল খুলে দিলি ঘারে,

জোড় হাতে তুই ডাকিস কারে ?

প্রলয় যে তোর ঘরে ঢোকে । (১০)

* * *

আমি যে আর সহিতে পারিনে

সুর বাজে মনের মাঝে গো

কথা দিয়ে কহিতে পারিনে । (১১)

* * *

যাঁর প্রেমের আকর্ষণে আকৃষ্ট হ'য়ে কবি এতকাল কেঁদেছেন
তাঁর সেই প্রেমকে কবি বলেছেন সর্বনাশা । হাফেজও
বলেছেন—

কস্ বদৌরে নাগিসত্ তরফিনবস্ত আজ্ আফিয়াত । *

সত্যের যে সন্ধানী তাঁর আরাম-আয়েসে আগুনের স্পর্শ ই
লাগে । আচার্য্য জগদীশচন্দ্রের বক্তৃতা যাঁরা শুনেছেন তাঁরা
তাঁর কাছেও এই কথাটিরই আভাস বেশী করে' পেয়েছেন ।

গীতালির “আবার যদি ইচ্ছা করো” শীর্ষক কবিতাটিও
খুবই লক্ষ্যযোগ্য । কত অল্প কথায় কত বিস্তৃত আর রসময়
ছবি ফুটিয়ে তোলা হয়েছে ! কবির এই ক্ষমতার আরো বেশী
পরিচয় পাওয়া যায় এর পরে রচিত পলাতকায় আর বিশেষ

*তোমার নাগিস-চোখের সামনে কারো সাধ্য নাই যে আরামে বসে থাকে ।

করে' লিপিকায় ।— তাঁর আধ্যাত্মিক সাধনার উচ্চভূমিতে দাঁড়িয়ে
চিরপরিচিত অতি বড় ধরণীর পানে চেয়ে কবি বলেছেন—

আবার যদি ইচ্ছা করে।

আবার আসি ফিরে

হুঃখ স্মৃতির ঢেউ-খেলানো

এই সাগরের তীরে ।

আবার জলে ভাসাই ভেলা,

ধুলার পরে করি খেলা

হাসির মায়া-মুগীর পিছে

ভাসি নয়ন-নীরে ।

কাঁটার পথে অঁধার রাতে

আবার যাত্রা করি ;

আঘাত খেয়ে বাঁচি, কিম্বা

আঘাত খেয়ে মরি ।

আবার তুমি ছদ্মবেশে

আমার সাথে খেলাও হেসে ।

নূতন প্রেমে ভালোবাসি

আবার ধরণীরে ।

রবীন্দ্রনাথের আধ্যাত্মিক সাধনার স্বরূপ গীতালিতে বেশ
পরিষ্কৃত হ'য়ে উঠেছে । তিনি বলেন—

সেই ত আমি চাই !

সাধনা যে শেষ হবে মোর

সে ভাবনা ত নাই ।

* * *

এমনি করে' মোর জীবনে

অসীম ব্যাকুলতা,

নিত্যনূতন সাধনাতে

নিত্য নূতন ব্যথা ।

“নিত্যনূতন সাধনাতে নিত্যনূতন ব্যথা” সহ্য করার ভিতরে মুক্তির স্বাদ আছে । কবির জীবন এতেই ভোর হবে, না এমন দিন আসবে যেদিন তাঁর প্রতিভা-নির্ঝরিণীর সব কলকল ভাষ সাগরসঙ্গমে নীরব হ'য়ে যাবে, কে তা বলতে পারে ? কিন্তু এই কবিতার অন্য জায়গায় তিনি যে বলছেন—

ফলের তরে নয়ত খোঁজা,

কে বইবে সে বিষম বোঝা,

যেই ফলে ফল ধূলায় ফে'লে

আবার ফুল ফুটাই ...,

এটি অনেকখানি তাঁর ব্যক্তিগত সাধনার কথা হ'লেও এর ভিতরে একটি বড় সত্যের সাক্ষাৎ পাওয়া যাচ্ছে ।

আধ্যাত্মিক সাধনায় ঝাঁদের উপলব্ধি তত্ত্ব-আকারে, অনুশাসন-আকারে ফলের মতন দেখা দিয়েছে, তাঁদের মাহাত্ম্য ইতিহাসে কীর্তিত হয়েছে । অবতার-পর্যগম্বরূপে, শাস্ত্রকাররূপে, পথ-প্রদর্শক গুরুরূপে তাঁরা মানুষের পূজা পেয়েছেন । তাঁদের

মহাত্মা যে অসাধারণ একথা কে অস্বীকার করবে? কিন্তু একদিকে যেমন রয়েছে তাঁদের প্রতিভার উজ্জলতা, তেমনি অন্যদিকে দেখা যায় দুর্বল লোকের জীবনে তাঁদের প্রভাবের বিকারের অন্ধকার। তাঁদের আবিষ্কৃত যে-সব তত্ত্ব যে-সব উপদেশ তাঁরা মানুষকে দিয়েছেন, সে-সব কালে-কালে মানুষের উপর অকথা অত্যাচারই করেছে। জগতের সব ধর্মের ইতিহাসই বহুল পরিমাণে এই ফলের বিষম বোঝার দৌরাভ্যাস ইতিহাস নয় কি? অনন্ত তত্ত্ব, অনন্ত সৌন্দর্যের নিলয়, যে ভগবান্ তাঁকে বাদ দিয়ে তাঁর বিশেষ আনন্দ বিশেষ উদ্দেশ্য প্রকাশিত যে অবতারে পয়গম্বরে, মানুষ তাঁদেরই জীবনের সব অবস্থার অবলম্বনরূপে বেশী করে' চেপে ধরে নেই কি? মানুষের সব ব্যাপারেই এই গুরুর অত্যাচার আদর্শের অত্যাচার—সাধনার ফলের 'বিষম বোঝা'র অত্যাচার।

এখন অবশ্য এই গুরুগিরির অত্যাচার আন্তে-আন্তে হাল্কা হবার পথে দাঁড়িয়েছে। শিক্ষা রাজনীতি ইত্যাদির ক্ষেত্রে গুরু এখন বন্ধু হ'য়ে উঠেছেন—অন্ততঃ সে-সত্য স্বীকৃত হয়েছে। কিন্তু জীবনের শ্রেষ্ঠ ধন যে ধর্ম—ভগবৎ-উপলব্ধি—সেখানেও যে গুরু শুধু বন্ধু, অবতার পয়গম্বর প্রাচীন আদর্শ সবাই বন্ধু, একটুখানি সহায়, তা'র বেশী নয়, তা'র বেশী হ'লে তাঁরা যে মানুষের উপর দৌরাভ্যাস করেন, তাদের জীবনে সত্যকার ফুল ফোটাবার সুযোগ নষ্ট করে দেন—দেখা যাচ্ছে, এই আশ্চর্য্য সন্ধানী মানুষের বড় কামনার ধন সেই সত্যকে নিজের জীবনে

উপলব্ধি করে' মানুষকে উপহার দিয়েছেন। তাঁর আধ্যাত্মিক সাধনাকে তত্ত্ব-আকারে অনুশাসন-আকারে জমিয়ে তুলতে তাঁর কত সঙ্কোচ !

ফলের তরে নয়ত খোঁজা,
কে বইবে সে বিষম বোঝা !

একহিসাবে স্ববীন্দ্রনাথের সমগ্র কবি-জীবনই বিশ্ব-মানবের কাছে এই সংস্কার-মুক্তির উপহার,—ইতিহাসের ধারায় সহস্র-সংস্কারে-বদ্ধ মনুষ্যের ভিতরেও অনুভব করা যায় যে অবস্থানের চমৎকারিত্ব, তা'রই মূর্ত মহিমা। *

* চতুরঙ্গের শচীশ বলছেন—আমার অন্তর্যামী কেবল আমার পথ দিয়েই আনাগোনা করেন।

তৃতীয় পর্যায়

গীতালিতে রবীন্দ্রনাথের আধ্যাত্মিক সাধনার বেশ একটা সার্থকতা লাভ হয়েছে, আমরা দেখেছি। এই সার্থকতার রসে কবি নিজেকে একেবারে ডুবিয়ে দিতে পারতেন— অর্থাৎ অনেক ভক্ত তা পেয়েছেন। তা হ'লে তাঁর গানে হয়ত অনুভব করতে পারা যেত হাক্কেজ বা কবীরের জমাট মিলনানন্দ। কিন্তু তা না পেয়ে আমরা দুঃখিত নই, কেননা দেখতে পাওয়া যাচ্ছে, স্বয়ং কবি এর জন্য দুঃখিত নন। তিনি আর কিছুই সন্ধান পেয়েছেন আর এক অপূর্ব মমতার সঙ্গে সে-পথ অনুসরণ করে' চলেছেন।

গীতালির এই সার্থকতার সবলতায় কবি অনুভব করছেন গতির আনন্দ। তাঁর সমগ্র জীবনের ভিতরেই গতি যথেষ্ট তূর্ণ—হিল্লোলিত ত বটেই। এখনকার এই দৃষ্টির আর চিন্তের সবলতায় কবি প্রত্যক্ষ করছেন তাঁর সেই আজীবন পথিক-রূপ—

আমি পথিক পথ আমারই সাথী।

* * * *

বাহির হ'লেম কবে সে নাই মনে।

যাত্রা আমার চলার পাকে

এই পথেরই বাঁকে বাঁকে

নূতন হ'ল প্রতি ক্ষণে ক্ষণে।

* * * *

ঐ যে, ওদের কালো মেয়ে নন্দরানী
যেমনতর ওর ভাঙা ঐ জান্নাখানি,
যেখানে ওর কালো চোখের তারা
কালো আকাশতলে দিশাহারা ;
যেখানে ওর এলোচুলের স্তরে স্তরে
বাতাস এসে কর্ত্ত খেলা আলসভরে ;
যেখানে ওর গভীর মনের নীরব কথাখানি
আপন দোসর খুঁজে পেত আলোর নীরব বাণী ;

তেমনি আমার বাঁশের বাঁশি আপন-ভোলা
চারদিকে ঘোর চাপা দেয়াল, ঐ বাঁশিটি আমার জান্না খোলা।
ঐখানেতেই গুটিকয়েক তান

ঐ মেয়েটির সঙ্গে আমার ঘুচিয়ে দিত অসীম ব্যবধান।
এ সংসারে অচেনাদের ছায়ার মতন আনাগোনা,
কেবল বাঁশির সুরের দেশে ছই অজানার রইল জানাশোনা।
যে কথাটা কান্না হ'য়ে বোবার মতো ঘু'রে বেড়ায় বুকে
উঠল ফুটে বাঁশির মুখে।

বাঁশির ধারেই একটু আলো, একটুখানি হাওয়া,
যে-পাওয়াটি যায় না দেখা স্পর্শ-অতীত একটুকু সেই পাওয়া।

এই এক অসাধারণ প্রতিভার সঙ্গলাভ আমরা এতক্ষণ
করলাম, বলা যেতে পারে,—নিত্য জাগরণ যার ধর্ম্ম। বাঙালীর
ভবিষ্যৎ হয়ত মন্দ নয় ; এক শত বৎসরের তিতরে বাঙালীর ঘরে
জন্মেছেন রামমোহন, মধুসূদন, রামকৃষ্ণ, রবীন্দ্রনাথ। এঁদের

এক জনকে এক শত বৎসরে পেলে একটি সমাজ নিজেকে ধন্য মনে করতে পারে।

আধুনিক বঙ্গসাহিত্য রবীন্দ্রনাথের প্রভাবে যে প্রভাবান্বিত সে কথা বলবার দরকার করে না। কিন্তু আজ পর্যন্ত রবীন্দ্র-প্রতিভার চাকচিক্যেই যে আমরা মুগ্ধ হ'য়ে রয়েছি, তা'র প্রতি স্থির দৃষ্টিতে চাইবার আকাঙ্ক্ষা আমাদের অন্তরে তেমন প্রবল হয় নি—এ কথা ভাববার সময় এসেছে।

রবীন্দ্রনাথ আজ বিশ্ববিখ্যাত পুরুষ। তাঁর খ্যাতিতে বাঙালী গৌরবান্বিত। কিন্তু তাঁর এ খ্যাতিকে সত্যকার খ্যাতিতে রূপান্তরিত করবার, অর্থাৎ, তাঁর প্রতিভাকে একটা জাতির জীবনের বস্তু ক'রে তা'কে সার্থকতা দান করবার, শ্রেষ্ঠ অধিকার যে বাঙালীরই আছে এ কথা ভুললে চলবে না। বাঙালীর অত্যন্ত অসম্পূর্ণ জাতীয়জীবন ও সাহিত্যের জন্য এর প্রয়োজন বড় বেশী।

রবীন্দ্রনাথের বহু সুন্দর সৃষ্টির সামান্য সামান্য পরিচয় আমরা এতক্ষণ পেয়েছি। কিন্তু তাঁর সমগ্র কাব্যশতদল আশ্রয় ক'রে ফু'টে রয়েছে যে এক মহিমান্বিত প্রতিভা, বিধাতার হাতের সেই অপূর্ব সৃষ্টির মাহাত্ম্য উপলব্ধির অধিকারী—শ্রদ্ধাবান্ মার্জিতবুদ্ধি শ্রম-অকাতর পাঠক। —

অধ্যাপক কাজী আবদুল ওহুদ এম-এ প্রণীত

অন্যান্য গ্রন্থ ।

১। নব পর্যায়—১০ ও ১১

মুস্তফা কামাল সম্বন্ধে কয়েকটি কথা, সাহিত্যে সমস্তা, “মানব-মুকুট”, পণ্ডিত সাহেব, কাজী ইমদাদ-উল-হক স্মরণে, সৃষ্টির কথা, সম্মোহিত মুসলমান, এই কয়েকটি প্রবন্ধের সমষ্টি ।

আনন্দ বাজার পত্রিকা বলেন :—

...গ্রন্থখানি সাহিত্যের স্থায়ী সম্পদ এ কথা আমরা মুক্তকণ্ঠে বলিতে পারি ।...

২। নদীবন্ধে—১১০

রবীন্দ্রনাথ বলেন :—

আপনার লিখিত “নদীবন্ধে” উপন্যাসখানিতে মুসলমান চাষী গৃহস্থের যে সরল জীবনের ছবিখানি নিপুণভাবে পাঠকদের কাছে খুলিয়া দিয়াছেন তাহার স্বাভাবিকত, সরসতা, ও নূতনত্বে আমি বিশেষ আনন্দলাভ করিয়াছি, এই কামনা আমার কৃতজ্ঞতা জানিবেন ।

৩। মীর পরিবার ও অন্যান্য গল্প—১১০

শরৎচন্দ্র বলেন :—

...বই উপহার পাইয়া গ্রন্থকারকে ছুটা ভাল কথা বলিতে, সর্বান্তঃকরণে উৎসাহ দিতে পারি না বলিয়া আমি অতিশয় কুণ্ঠিত হইয়া থাকি । আপনি সেই সুযোগ আমাকে দিয়াছেন বলিয়া আপনাকে ধন্যবাদ জানাইতেছি । সত্যই আমি ভারি খুশি হইয়াছি ।...

৪। নব পর্যায় (দ্বিতীয় খণ্ড)—

নেতা রামমোহন, মিলনের কথা, বাঙালী মুসলমানের সাহিত্য-সমস্তা, “অভিভাষণ,” ফাতেহা-ই-দৌরাজ দাহাম, ডায়রির এক পৃষ্ঠা, এই কয়েকটি প্রবন্ধের সমষ্টি । (১৯২৮ সালের মার্চে প্রকাশিত হইবে ।)